


लोक चेतना री राजस्थानी तिमाही

राजस्थाली



सम्पादक

श्याम महर्षि

प्रबन्ध सम्पादक

रवि पुरोहित

लोकचेतना री राजस्थानी तिमाही
राजस्थली

जनवरी-मार्च, 2021

बरस : 44

अंक : 2

पूर्णांक : 150

संपादक

श्याम महर्षि



प्रबंध संपादक
रवि पुरोहित



प्रकाशक

मरुभूमि शोध संस्थान

राष्ट्रभाषा हिन्दी प्रचार समिति, श्रीडूंगरगढ़ 331803

www.rbhpsdungargarh.com



आवरण

ज्योत्सना राजपुरोहित

e-mail : rajasthalee@gmail.com

ravipurohit4u@gmail.com



रेखाचित्राम

रोहित प्रसाद पथिक

ग्राहक शुल्क

पांच साल : 500 रिपिया, आजीवण : 1500 रिपिया, संरक्षक सदस्य : 5100 रिपिया

Google Pay / Paytm : 9414416252

इण अंक में

संपादकीय		
रुजगार री भासा बणणी चाईजै राजस्थानी कहाणी	श्याम महर्षि	3
फगत अेक सवाल	भरत ओव्वा	5
हेरणी	पूर्ण शर्मा 'पूरण'	14
लधुकथा		
भलो मिनख / भाजी कोनी, हारगी कल्लो	अमीर अहमद सुमन	19
व्यंग्य		
झपिया म्हारज	संजय पुरोहित	21
ललित निबंध		
लोक रै आलोक मांय लोककथावां	डॉ. मंगत बादल	24
कविता		
परमाणु रै पळकां बिच्चै	डॉ. आईदानसिंह भाटी	29
दो प्रेम कवितावां	ओम नागर	31
टिब्बा म्हारो माण / म्हारा सुपना / हियै रो हेत		
हेत / जिंदगाणी	सुनील गज्जाणी	33
हिवड़ो है अधीर / म्हारी क्यारी-सखी प्यारी		
कविता री चाह / मोरपांख में रमी राधा	सीमा राठौड़ 'शैलजा'	35
बाल-कविता		
तूं थारै घर जाव करोना / बीरा लेवण बेगो आई		
आव बेलिया पेच लड़ावां	डॉ. शारदा कृष्ण	37
हाइकू		
दस हाइकू	दीनदयाल शर्मा	39
गीत		
सुरंगो राजस्थान / असर अस्यो अंग्रेजां आळो	प्रहलाद कुमावत 'चंचल'	40
संस्मरण		
केसर री क्यारी मांय बादळां सूं बतळावण	डॉ. रेणुका व्यास 'नीलम'	42
नानीसा	मनोहर सिंह राठौड़	46
कूत		
'नेव निवाळी' सूं पड़तो नारी मन री पीड़ रो परनाळो	डॉ. फतेहसिंह भाटी	54

रुजगार री भासा बणणी चाईजै राजस्थानी

घणै हरख री बात है कै नूवी राष्ट्रीय शिक्षा नीति (2021) में प्राथमिक स्तर री शिक्षा विद्यार्थी नै उणरी मातृभासा में देवण रो प्रावधान करीज्यो है। अबै देखणो औ है कै राजस्थान मांय नई शिक्षा नीति रै इण प्रावधान नै किण भांत लागू कस्यो जावैला। हालांकै राज्य सरकार री राजस्थान शिक्षा परिषद् बरस 2021 री सरुआत मांय ई इण बात रा संकेत देय दिया है कै राजस्थान री सरकारी स्कूलां मांय राजस्थानी पोथ्यां विद्यार्थियां रै पढण सारू उपलब्ध कराईजैला। परिषद् सगळ्ळा सरकारी विद्यालयां रै पुस्तकालयां मांय क्षेत्रीय भाषा राजस्थानी री पोथ्यां री खरीद सारू 13 जनवरी, 2021 नै इण बाबत अेक विज्ञप्ति जारी करी है, जिणमें प्रकाशकां सूं राजस्थानी पोथ्यां री खरीद सारू नमूना प्रतियां मांगीजी ही।

भारतीय संविधान मांय ई औ अधिकार दिरीज्यो है कै राज्य सरकार चावै तो विद्यार्थियां नै प्राथमिक स्तर री शिक्षा उण प्रदेस री क्षेत्रीय भासा मांय दी जाय सकै, भलाई वा भासा संविधान री आठवीं अनुसूची मांय जुड़्योड़ी हुवो कै मत हुवो। हां, प्रदेस रो बहुसंख्यक वरग उण भासा नै बोलण-समझण वाळो हुवणो चाईजै। इण हिसाब सूं राजस्थानी रै प्राथमिक शिक्षा में प्रवेश मांय कोई बाधा नीं है।

इणरै सागै-सागै राजस्थान री प्रतियोगी परीक्षावां मांय भी प्रश्न-पत्र रो कीं हिस्सो राजस्थानी भासा, साहित्य अर संस्कृति सारू तय करीजणो चाईजै, जिणसूं कै प्रदेस रा प्रतियोगियां नै बेसी सूं बेसी रुजगार मिल सकै। कीं बरसां पैली आर.अे.अेस. अर दूजी प्रतियोगी परीक्षावां मांय इण भांत रो प्रयोग करीज्यो भी हो, जिणरा सकारात्मक परिणाम साम्हीं आया अर प्रदेस रा केई युवा प्रशासनिक अधिकारी बणण मांय कामयाब हुया हा। प्रशासनिक अधिकारी री ई क्यूं, लिपिक, अध्यापक आद री सगळी छोटी-मोटी प्रतियोगी परीक्षावां मांय राजस्थानी भासा, साहित्य अर संस्कृति सूं संबंधित सवाल सामल करीजणा चाईजै। राजस्थान रै टाळ हरेक प्रदेस री प्रतियोगी परीक्षावां मांय इण भांत री व्यवस्था है, जिणसूं घणकरा प्रतियोगी उण प्रदेस रा ईज चयनित हुवै।

किणी पण प्रदेस री भासा रै रुजगार सूं जुड़्यां ई उण भासा अर प्रदेस रो चौफेरी विगसाव संभव है। आसा है आगलै शिक्षा सत्र सूं राजस्थानी भासा रो विसय प्राथमिक स्तर री शिक्षा में सामल करण रै सागै प्रतियोगी परीक्षावां मांय भी राजस्थानी भासा अर अठै री कला-संस्कृति नै पूरी तवज्जो दिरीजसी। जै राजस्थान, जै राजस्थानी।

—श्याम महर्षि

फार्म नं. 4, नियम-8

पत्रिका रो नांव	:	राजस्थली
प्रकाशन री ठौड़	:	श्रीडूंगरगढ़
प्रकाशन री अवधि	:	तिमाही
मुद्रक	:	महर्षि प्रिंटर्स, श्रीडूंगरगढ़
राष्ट्रीयता	:	भारतीय
ठिकाणो	:	राष्ट्रभाषा हिंदी प्रचार समिति, श्रीडूंगरगढ़ (बीकानेर)
प्रकाशक	:	महावीर माली
राष्ट्रीयता	:	भारतीय
ठिकाणो	:	राष्ट्रभाषा हिंदी प्रचार समिति, श्रीडूंगरगढ़ (बीकानेर)
संपादक	:	श्याम महर्षि
राष्ट्रीयता	:	भारतीय
ठिकाणो	:	राष्ट्रभाषा हिंदी प्रचार समिति, श्रीडूंगरगढ़ (बीकानेर)
उणां शेयर होल्डरां		
रा नांव अर ठिकाणा,		
जिणा कनै कुल पूंजी		
रा 10%सूं बत्ता शेयर है:		कोई कोनी

म्हें महावीर माली घोसित करूं कै ऊपरलो विवरण म्हारी जाणकारी
अर विस्वास रै मुजब सत्य अर वास्तविकता माथै आधारित है।

महावीर माली
प्रकाशक



भरत ओज्जा

फगत अेक सवाल

बियां तो जेठारामजी सत्तर पार करग्या हा, पण आजकाल सत्तर बरस कित्ताक हुवै। इत्ता उंतावळा तो दर ई जावता को लागै हा नीं। सेहत-पाणी ठीक ही। बजां सिर रो काम-धंधो ई करता। बीमार-सीमार कोई हा कोनी। खांसी-जुखाम तो होवतो ई रैवै। खांसी-जुखाम अर थोड़ी भोत ताप-सिरवा सूं कुण मरच्यो सुण्यो? पण जुखाम रै पांचवै दिन ई जेठारामजी रा तो मोरिया बोलग्या। दो-तीन दिन तो घरै ई दवाई-पाणी ली, पण जद पार कोनी पडती दिसी तो अस्पताळ कानी भाज्या। डॉक्टरां नैं कोरोना रो बैम हो, इण वास्तै भरती करतां ई कोरोना रो सैम्पल लेयनै आथण ई बीकानेर भेज दियो, पण सैपल री रिपोर्ट आवै उण सूं पैली ई जेठारामजी तो बूचकी मनायग्या। अब कांई करच्यो जावै? जिला अस्पताळ अधीक्षक रै तो माला मंडग्या। जे घरवाळा नैं जेठाराम जी री ल्हास सूंप देवै अर रजा-कजा रिपोर्ट पॉजिटिव आय जावै तो? गांव-कस्बां वाळा पत्रकारां नैं थे जाणो ई हो, बाल री खाल काढै। औ सुख महानगर रै मोटै पत्रकारां रो। इसी छोटी-मोटी बातां पर ध्यान ई कोनी देवै। बियां वां लाइयां रो ई कसूर कोनी। वां नैं इत्ती वैल कठै कै वै जेठाराम जेडै अलियै-छलियै माथै खबर बणावै? औ कोई प्रधानमंत्री थोडो ई है जिको इण रै लारै-लारै कैमरो चक्यां फिरै। आं बापड़ां नैं तो आजकाल बिडुद बखाणण अर लपोसा लगावण सूं ई फुरसत कोनी। फेर न तो औ सुशांत राजपूत है, न भारत-पाकिस्तान, न मंदिर-मस्जिद तो न जम्मू-कश्मीर। छेकड़ हो तो जेठियो टांडी ई। पण फेर ई जेठाराम री मौत पत्रकारां सारू खबर बणगी। कारण कै जेठारामजी री मौत

ठिकाणो :
37, सेक्टर 5
नोहर (हनुमानगढ़)
राजस्थान 335523
मो. 9414503130

महानगर मांय नीं, राजस्थान रै उत्तराधै सिंवाड़ै रै अेक छोटै-सै स्हर हनुमानगढ़ मांय हुयी ही। औ दिल्ली का मुंबई तो है कोन। अठै रा पत्रकारां कन्नै तो अै ई खबरां—कुण नहर मांय सटको नाख पाणी चोर लियो। कुण कीं रै बटोड़ै सूं थेपड़ी चक नै लेयगयो। कुणसै गांव रो झोटो चोरीजगयो। कठै लट्ट-सोटो हुयगयो। कठै छोरै भाजगी। कठै हथकढ़ अर चिट्टो पकड़ीजगयो। कठै आ हुयगी, कठै बा हुयगी। अठै तो भई अै ई समाचार! सलेब्रेटी अठै लाधै ई कुण, जिकै री स्टोरी चलाई जा सकै। पण जेठारामजी मरतां पाण सलेब्रेटी बणग्या। पण इण मांय ई जेठारामजीजी रो कीं लेणो-देणो नीं है। जेठारामजी रो नीं लूण है, नीं हळदी अर नीं फिटकड़ी, पण फेर ई रंग चोखो आयो तो आयो। फकत अेक ई कारण। जेठारामजी री मौत कोरोना सूं हुवण रो सक!

खैर... तो बात वा ई सागण कै कोरोना री रिपोर्ट आवण सूं पैली ई जेठारामजी सौ बरस करग्या। अब काई कर्यो जावै? प्रशासन सलाह-सूत करनै औ तैय कर्यो कै जद ताई जेठारामजी रै सैंपल री रिपोर्ट नीं आवै तद ताई 'डैड बॉडी' नै मोर्चरी मांय रखवा दी जावै। अब डैड बॉडी नै कुण, कियां मोर्चरी ताई ल्यावै? इण बात रो फेर सेको मंडायो। इण बाबत ई अस्पताळ नै घंटाखंड माथाफोड़ी करणी पड़ी जणा कठैई जायनै बात घड़ बैठी। आ न्यारी बात है कै डॉक्टर, कंपाउडर अर सफाई कमर्चारी तकात इण बहस मांय उळझेड़ा हा कै इण केस मांय म्हारी ई ड्यूटी कियां लगाई? कोई कूढीजतो अस्पताळ अधीक्षक नै गाळ काढै हो तो कोई देख लेवण री धमकी देवै हो, तो कोई सराप देवै हो। पण कीं हवो भलाईं जिकां री इण काम मांय ड्यूटी ही वै ड्यूटी तो बजावै ई हा।

अस्पताळ मांय जेठारामजी री डैड बॉडी नै पैकिंग करण रो दरसाव बखाणण जोग नीं है। बस इतै मांय ई समझ जावो कै जेठारामजी री मिरत देह नै थैली मांय पैक करणो, ऊंट नै पजामो पैराणै बरोबर हो। अब आप ई स्याणा हो, हाथ लगायां बिना, फकत लक्कड़-डंडा सूं कदै मिनख थैलां मांय घल्या करै काई? घणो बखाणूं कोनी। केई भाइयां नै चक्कर आ सकै तो कइयां नै रीस। इण वास्तै माफी मांगतां थकां इण दरसाव री रील माथै कतरणी चलाऊं। फिल्म सेंसर बोर्ड दाई लेखक नै इतो हक तो हुवणो ई चाईजै, आ बात तो थे ई हंकारो!

...तो सौ बातां री अेक बात कै जियां-तियां जड़ाजंत करनै जेठाराम री 'डैड बॉडी' अस्पताळ रै लारलै गेट सूं बारै काढी तो ठाह ई नीं पड़ै हो कै इण बैग मांय जेठारामजी रो खोळियो है कै इयां ई पनसूरो भर नाख्यो है। जेठारामजी रै मोटोड़ै छोरै जगदीश रो जीय तो करै हो कै बापूजी रो छेहलो मूंडो तो देखल्यूं। पण देखण कुण देवै? जे रिपोर्ट नेगेटिव आई तो अेक बार कोनी हजार बार सगळा घर रा देखियो अर जे आयगी पॉजिटिव तो ई जलम मांय बापूजी रो मूंडो देखणो तो दूर नेड़ै ई को फटकण देवै नीं।

स्टेचर माथे जेठाराम री 'डैड बॉडी' अस्पताळ रें लारलै गेट निसरी तो स्यापो ई पङ्गोडो हो। अेक तो प्रशासन अर डॉक्टरां वानै भोळावण देय दी ही अर दूजो पुलिसवाळां भाइड़ा हाथ मांय डांग इयां पकड़ राखी कै बित्रै जावण री कीं री हिम्मत ई नीं हुय सकै ही। जेठारामजी रा बेटा-पोता न्यात बारै काढेड़ा-सा गेट सूं आंतरे खड्चा टुगार-टुगार देख्यां बगै हा।

मोर्चरी वाळो गार्ड जेठारामजी री स्टेचर नें देखतां ई चिमक्यो। अेक तो पीपीई किट पैरेड़ा भूत-सा सफाई कर्मचारी अर सागै जेठारामजी री जड़ाजंत काया अर औ माहौल! मोटां-मोटां रो काळजौ जग्यां छोडज्या। गार्ड इण भांत पासै हुयो जाणै मुर्दो नीं, कोई काळौ विसधर हुवै।

बियां तो पांचवै-सातवै दिन अै कर्मचारी कोई नै कोई मुर्दो अठै ल्यावै ई ल्यावै पण इसो मुर्दो तो अै कर्मचारी ई पैली दफा ल्याया हा अर गार्ड ई औ हिसाब-किताब पैली बारी देख्यो हो। गार्ड तो पैलां सूं ई दूर जायनै खड्चो हुयग्यो हो। हिफाजत रें तौर पर कर्मचारियां पीपीई किट पैर राखी ही, पण तो ई वां रें भीतर गादडो बड्योडो हो। हाल जिलै मांय कोरोना रोगी तो सेंकडै नेडै आयग्या, पण सै ठीक हुय-हुयनै आप-आपरै घरै गया-गुवाया। पण जेठारामजी तो रिपोर्ट आवण सूं पैली ई पग पाधरा कर दिया। खुदा न खास्ता जे आयगी रिपोर्ट पॉजिटिव तो सेकौ मंड जासी।

रात नें जेठारामजी री लाश तो मोर्चरी मांय मजै सूं सूती रैयी, पण घरआळा नें समक रात नींद कोनी आई। कणां ई कोई पसवाडो फोरै तो कणां ई कोई। लागै हो समूचो घर ई जागतो पसवाडो फोरै हो। मोर्चरी रें गार्ड री हालत तो और ई माडी। थम-थमनै ध्यान मोर्चरी कानी उठज्या। बियां जेठारामजी लाई सपत्ता मिनख। जीवता जीय कीडी नें ई को सेधी नीं, मर्यां पछै तो किणनै सेधता ई कियां! पण तोई गार्ड साहब रें घरळ-मरळ माचेडी ही। बियां ई समूळी रात कियां मास्क राखीजै, पण डरता सै गूगो धोकै। दिन निसरणौ ई महाभारत हुयग्यो। कैया करै है नीं कै जिकी चीज रो भय हुवै नीं, वो हुयां ई सरै। दिनगै जेठारामजी री रिपोर्ट तो पॉजिटिव! अस्पताळ सूं लेयनै कलेक्ट्रेट ताई रा कान खड़ा हुयग्या। अबै के कर्यो जावै? डैड बॉडी तो घरवाळा नें देवणी ई कोनी। जेठारामजी रो छेहलो संस्कार ई प्रशासन रें गळ मांय घलग्यो। देखो, कांई बगत आयो है! जिकै मिनख नै साब लोगां कदै आपरै नेडै कोनी फटकण दियो, फगत उपरै दाग रो ई सरजाम नीं करणो, उणनै छेहली लकड़ी ई देवणी। जेठारामजी नें जीवतां-जीव भलाई बास गळी रा लोग ई नीं जाणता हुवो, पण मर्यां पछै तो आखै स्हैर रा, फगत स्हैर रा ई क्यूं आखै जिलै रा बाजींदा मिनख बणग्या। बणै ई क्यूं नीं, आ जिलै मांय कोरोना री पैली मौत ही। पैलो तो पैलो ई हुवै। भलाई वो कीं ई हुवै।

जितो कूकारोळो जेठाराम री मौत माथै रात वां रै घरे कोनी माच्यौ उण सूं सवायो अब माचग्यो। आ तो बेजां करी नीं करतार! ना घर रै आंगणै जेठारामजी री अर्थी उतरसी अर नीं जेठारामजी री जोडायत उणरी छाती माथै चूडी झाडसी। न्हुवा-धुवाई अर कांमळ-चादर उढावणी तो गई कठै री कठै।

जेठारामजी री जोडायत तो बुसबुसियां पाटनै इमरस करै ही, “जगू रा बापूजी, आ थे के करी?”

पण लाई जेठाराम रै बस मांय हुंवतो तो वै मरता ई नीं। अर जे मरता ई तो कोरोना काल मांय तो दर ई नीं मरता। दाग मांय फकत पांच ई मिनख हा। वै तो चावै हा कै वांरी बैकुंठी नीसरै अर लारै ‘राम नाम सत है’ बोलतै लोगां रो तांतो ई नीं टूटै। बैकुंठी नीं सही, अर्थी माथै रामनाम री चादर ओढ्यां सूत्यो बेटां रै मोढै चढ नै कुटंब-कबीलै अर प्यारै-परसगियां नै लारै रुड्ढवतो श्मसाण घाट तो जावै। पोता उभाणै पगां अर्थी आगै दंडोत करता बगै, झालर अर संख सूं आभो गरणावै, पण लाई जेठारामजी री आ हूस मन री मन मांय ई रैयगी।

आथण कोई पांचेक बजे जेठारामजी नै जमदूत दिस्या हा। वांनै देखतां ई जेठारामजी अेकर तो डर्या। पण भळै याद आयो कै मिरतु री बगत जमदूत तो मिनख रै सिरहाणै ऊभा हुवै। पण अै सिरहाणै तो दूर, कमरै रै मांय ई कोनी बडै हा।

पण डाक्टरां तो जेठारामजी नै मिरत बतायनै आगली त्यारी मांय लागग्या। पण तो ई जमदूत तो बारणै आगै ई ऊभा। जेठारामजी नै थोडौ सक हुयो कै जद डाक्टरां म्हनै मरयो बतायनै गाभो उढा दियो तो जमदूत लेवण नै क्युं कोनी आवै? पण जेठाराम जेडै भोळै-ढाळै मिनख कन्नै इण जबर सवाल रो पडूत्तर कठै? पण तो ई जेठारामजी आ तो ताडग्या ई हा कै जमदूत मांयनै आंवता झिझकै। कारण चायै कोई रैयो हुवै, पण अै मांयनै तो कोनी बडै। जेठारामजी सोच्यौ कै जमदूत कठै ई दूर ऊभा-ऊभा ई फेंकनै गळ मांय फांसरडौ नीं घात नाखै। आ चेतै आंवतां ई वै उंतावळ्य-सा आपरी मिरत देह सूं बारै आया अर सावचेत हुयनै देह रै ऊपर जाय बैठ्या अर जमदूतां री ‘एक्टीवीटी’ रो लेखो लेवण लागग्या। जेठाराम नै इण बात रो इचरज हो कै अस्पताळ सूं निसरनै उणरी देह नै मोर्चरी मांय ल्या पटकी, पण जमदूत नेडै ई नीं आया। वै ई लोगां री भांत दो गज री दूरी रै सिद्धांत नै अपणाय राख्यो हो।

जमदूतां धरमराज नै आथण ई बता दियौ हो, “म्हाराज बगत लागसी। म्हे तो म्हारा रास-जेवडा लेयनै त्यार हा, कै इन्नै सूं जीव नीसरै अर बिन्नै म्हे उडतै जीव रै फांसरडौ घालनै काबू करां, पण म्हाराज! औ जीव तो कुजरबो। डाक्टर जद जेठाराम नै मिरत घोसित करै हा, म्हे बारणै मांय ई ऊभा हा। डॉक्टरां रै मिरत घोसित कर्यां रै कोई दस मिनट पळै जेठाराम रो जीव बारै आयो, पण औ कांई? आभै कानी जावण री बजाय

वो तो आपरी मिरत देही माथै ई चिपनै बैठगयो। अब म्हाराज कोरोना रो डर तो म्हानै ई लागै।”

“तो पछै?” धरमराज जमदूतां सूँ ई पडूतर चायो।

“म्हाराज, जे जीव देह सूँ उतरनै बारै आसी तो पकायत ई झप लेस्यां। अबार तो मोर्चरी आगै ई ऊभा हां।”

“औ तो खेतीखड़ियो भोळो-ढाळो जीव। आखी उमर धूड़ मांय सिर राखने गधियै दाई पच्यो। करजो ई सूँ उतरयो कोनी। दाणां ई नैं बेचणा आया कोनी। ओढण-पैरण अर बोलण रो ई नैं स्हरा कोनी। ई रो च्यारजरबी रो खातो तो कोरो पड्यो है।” चित्रगुप्त इचरज करता जमदूतां नैं कैयो।

“औ म्हाराज, आप नूँवो खातो संभाळो। बेटा राज रा नौकर है दोनूं। खेती करणी तो कणां ई छोडी इण। दस सालां सूँ स्हैर मांय रैवै। आ कुजरविद्या अटै सूँ ई सीखी है स्यात।” जमदूतां हाल ई करेड़ी तपतीश चित्रगुप्तजी रै साम्हीं मेल दी।

“ठीक है, ठीक है। वो तो चित्रगुप्त आपै ई देख लेसी। थे तो जीव रो ध्यान राखो।” धरमराज जमदूतां नैं हिदायत दी।

“म्हाराज, म्हानै तो लागै कै ई रै स्हैर री हवा लागगी। कोरोना रो डर कांई हुवै, औ लखगयो। म्हानै तो लागै, चिता रै लांपो लाग्यां पछै ई हाथ आसी।” जमदूतां सार काढ लियो हो।

जमदूत समची रात मोर्चरी आगै ऊभा रैया, पण जेठारामजी किसा बारै आ जावै ? आं दस बरसां मांय जेठारामजी इती दुनिया तो देख ई ली ही।

दिनूगै मोर्चरी आगै रैण-गैण। सनेटाइजर करणियां ढोलकी चक्यां दे गेड़ै माथे गेड़ा। मास्क बिना कोई बंदो ई को दिखै नीं। आज रो माहौल तो न्यारो। टीवी चैनलवाळा दूर सूँ ई मोर्चरी नैं दिखावै हा। वारी खबर रो स्टाइल वौ ईज हो, “अभी थोड़ी देर में निकलेगा इसी मोर्चरी से कोरोना का जिऽऽन।”

जेठारामजी रा दोनूं बेटा डरूं-फरूं हुयोड़ा अभा हा। प्रशासन ई मुस्तैद हो। एम्बूलेस न्यारी, पुलिस री गाडी न्यारी, असेडीअेम री गाडी न्यारी, नगरपरिषद् री जीप न्यारी। मतलब काल ताई रो ‘कुण जेठाराम’ आज हनुमानगढ़ रो बार्जीदो जेठाराम हो।

दिनूगै दसेक बजे रै आसै-पासै मोर्चरी आगै अस्पताळ री अेम्बूलेंस आ ऊभी हुयी अर देखतां ई देखतां उण मांय जेठारामजी री डैड बाँडी नैं कर्मचारियां इयां पटकी जाणै लूण रो कट्टो नाख्यो हुवै। जीवता हुंवता तो पकायत ई आपरी आदत मुजब कर्मचारियां नैं टोकता, “इयां के नालायको! सावळ छोडो नीं!” पण मर्योड़ा जेठारामजी कांई तो बोलता अर कांई कैवता! बस, चिप्या पड्या रैया देह रै। अेम्बूलेंस चाली तो टीवी चैनलवाळै पत्रकारां रै साथै जमदूत ई लारै-लारै हो लिया।

जमदूत जे पत्रकारां नें दीसता तो पकायत ई वारें मूंडै माथे माइक घालनै पूछता, “कोरोना के इस पहले जीव को यमलोक ले जाते हुए कैसा महसूस कर रहे हैं?”

कोई साहसी पत्रकार औ सवाल ई कर सकै हो, “सुना है कोरोना से हुई मौत में सरकार और आपके आंकड़े मेल नहीं खा रहे हैं। क्या कहना चाहेंगे आप?”

केई पत्रकार भाइयां रो तो जीय करै हो कै जांवता-जांवता जेठारामजी ई आपरी अेक बाईट देय जावै अर आपरा अनुभव साझा कर जावै। पण औ संभव कोनी हो। तो ई वै जेठारामजी री अेम्बूलेंस नें तो फिल्मावै ई हा। जेठारामजी टिरहाटै-सी आंख्यां काढता अेम्बूलेंस सूं ई बारै रो दरसाव जोवै हा। समूचो स्हैर वारी मौत माथे ई बंतळ करै हो। काई-काई बंतळ करै हो, आ बतावण री दरकार कोनी। जमदूत अेम्बूलेंस रै लारै-लारै थब्बा चढ्यां आवै हा।

जेठारामजी रै अेकर तो मन मांय आई कै जायनै चिप जाऊं जमदूतां रै अर कर नाखूं कोरोना पॉजिटिव। सगळो टंटो ई मेट द्यूं। पछै तुरंत ई चेतै आयो, “रे भोळा! जीवआत्मा रै क्यारो कोरोना! कोरोना तो फगत थारी देही ताई। तूं वां कन्नै गयो नीं अर थारो कारण-कुंडो कस्यो नीं। ई वास्तै छेहली दुनिया देखणी चावै तो चिप्यो पड़्यो रैय देही रै।”

आधींठै हांडी फोड़णवाळी जग्यां अेम्बूलेंस रुकी तो जेठारामजी रै जीव सोच्यो, “ले रे जीवड़ा! अेक क्रिया तो हुसी।”

जेठारामजी आपरै बेटा-पोता, कुटुम्ब-कबीलै, यार-बेलियां, आड़ोसियां-पाड़ोसियां, प्यारै-परसंगियां नै जोया, पण उठै कुण? काग पडै, कुत्ता भूसै। मोर्चरी सूं अेम्बूलेंस में घालती बगत जेठारामजी आपरै दोनू बेटा अर दोनू पोतां नें ऊभा जरूर देख्या हा, पण अठै तो वै दीस्या ई नीं।

जेठारामजी रै अेक उतरै अर अेक चढै, पण काई जोर!

“इण बेळा ई किन्नै मस्या है नालायक। इयां नीं भई कै छेकड़ली बगत तो कन्नै रैय जावां। पण आं नालायकां नै काई मतलब? आज समझ मांय आई है कै आं नालायक बेटां-पोतां वास्तै बेमतलब ई कंठ मौस-मौसनै माया जोड़ी। ढंग सूं खांवतो-पींवतो तो स्यात इत्तो उंतावळो जांवतौ ई नीं। पण अब पछतायां हुवै कै जद चीड़ी चुगगी खेत।” जेठारामजी अेम्बूलेंस मांय पड़्या कीरडीजै हा।

जीवता हुवता तो ललकर मारता, “अरे नालायको! किन्नै मरग्या! लारै काई थारी मां... नें रोवो! इन्नै म्हारै कन्नै क्यूं बळ आवो नीं?” वां स्यात बोलण री आफळ ई करी पण कंठ अर जीभ तो देह मांय ई रैयग्या हा अर देह नें ठाह नीं किता थैलां मांय भर नाखी ही। जे देह सूं थैली उतारण ढूकै तो थैली मांय थैली, थैली मांय थैली प्याजियै रा छूंतका ज्यूं उतार ई बोकरो भलाई।

जेठारामजी देख्यो कै अम्बूलेंस री लारली गाडी सू तीन जणा उतर्या।

“तो काई अै ईज हांडी फोडसी?” जेठारामजी नैं अणूती झाळ आई।

छोरा कन्नै हुवता तो पकायत ई कान पकड़ नै कैवता, “अरे नालायको! हांडी तो कम सू कम थे फोड़ द्यो। न्हात ई थारो बाप हूं।”

पण वै कर्मचारी क्यां वास्तै हांडी फोड़ै हा। वानै तो अम्बूलेंस नैं सैनेटाइज करणी ही। पीठ लारै चकी ढोलकी सू पांच-सात फंवरा मार्या अर मुसाणां मांय ल्या बाड़्या। जेठारामजी देह माथै चिप्या सगळो खिलको देखै, पण करै तो करै काई?

अम्बूलेंस सू जेठारामजी री डैड बॉडी उतारी ई कोनी ही कै मुक्तिधाम विकास कमेटी रा पदाधिकारियां रोळो घाल दियो। वारो कैवणौ हो कै कोरोना रै मरीज रो अठै दाग कोनी हुय सकै।

जेठारामजी रै जीय मांय आई कै अम्बूलेंस सू फदाक मारनै सीधौ कमेटी रै खरड़पंचा कन्नै जायनै कैवै, “मुसाण थारै बाप रा है, जिको म्हारो अठै दाग कोनी हुवण देवो। अरे नालायको! मुर्दे रो दाग तो मुसाणां मांय ई हुया करै। कदे मुर्दे नैं घरां दाग देवता देख्यौ है?” पण जेठारामजी आपरी देह नैं छोडनै कियां जा सकै हा। देह छोडी नीं अर जमदूतां झप्यो नीं। पण जेठारामजी री सबोधी राखी मोटोडै बेटै जगदीश। सबद तो जेठारामजी रा हा ई। बस जगदीश तो मूंडौ-मूंडौ खोल्यो।

जगदीश री बात सुणनै कमेटी रो अेक खरड़पंच बोल्यो, “भाई, म्हे कद कैवां कै मुर्दै नैं घरे दाग देवो। बिन्नै परलै पासै घणो ई बीड़ पड़्यो है, बिन्नै देय द्यो।”

“बिन्नै देई तू तैरै जामणियां नैं। म्हनै तो अठै ई देयसी। अरे नालायको! घरे आंगणै मांय म्हैं सुवाइज्यौ नीं, न्हुवायो मन्नै नीं। शंख-झालर मेरा बाज्या नीं, पिंडदान मेरो हुयो नीं। हांडी मेरी फूटी नीं, पाणी मेरै लारै ढोळीज्यौ नीं अर अब मुसाणा सू ई बेदखल करणा चावो।” जेठारामजी देह माथै पड़्या-पड़्या ई आकरा हुयां बगै हा।

“बिन्नै कोनी द्यां, दाग तो अठै मुसाणां मांय ई हुसी।” अबकै जेठारामजी रै छोटियै बेटै ओम हिम्मत करी।

“अठै तो म्हे कोनी हुवण द्यां।” खरड़पंचजी फैसलो-सो सुणा दियो।

“थे कुण हो भई नीं हुवण देवण वाळा? बाप रो राज है? देखां तो कियां कोनी हुवण द्यो। कुणसो रोकै, आओ दिखां!” ओम साम्हीं अडग्यो।

“वा मेरा शेर! आ हुयी नीं बात। मार साळां रै तुळवै में।” जेठारामजी उबक्या।

जमदूतां उमर गाळ दी मिरत आत्मा नैं धरमराज कन्नै लेय जावता, पण वां इसो खिलको तो आज ताई देख्यो ई कोनी हो।

बिन्नै धरमराजजी जमदूतां नैं फोन माथै फोन करै, “बगत टिप्यां बगै, जेठारामजी री आत्मा नै लेयनै बेगा-सा हाजर हुवो।”

कैया करै नीं कै दूध रो बळेड़ो छछ नैं ई फूंक मार-मारनै पीवै ।

धरमराजजी भोळाराम रै जीव नैं भूल्या कोनी हा । औ तो भलो हुवै नारदजी रो जिका वीणा सट्टै जीवात्मा ल्या नाखी । आज तो वीणा नैं पूछै ई कुण है ।

पण काई जोर ? जमदूत साफ कैय दियौ, “म्हाराज ! म्हारै कत्रै इलाज नीं है । कोरोना रो रोगी है आगलो । डैड बाँडी रै चिप्यो बैठ्यो है । कुण लोवै लागै ? इसो ई सोरो है तो थे पितासल्यो ?”

धरमराजजी बोल्या, “कोई बात नीं । घंटा, आधघंटा मांय तुरड़सी ई । पण देख्या, ध्यान राख्या, भोळाराम री दाई फटकार नीं जावै ।”

“वा तो म्हाराज आप चिंता ई ना करो । इन्नै छोरै चिता रै लांपो लगायो अर बिन्नै ई रै गळ मांय फांसरड़ो घाल्यो । पण आंरो झोड़ तो सलटै ।”

बात नैं बधती देखनै प्रशासन आगीनै आयो अर बोल्या, “देखो, बीच बिचाळो करल्यो । घणी दूर तो नीं, पण थोड़ै सै पासै करल्यो ।”

जेठारामजी रो छोटियो छोरो ओम गाभां बारै हुयग्यो । बोल्या, “कुण ? कुण करलै ? मुसाण कीं रै बाप रा कोनी । अठै ई करस्यां, अठै !” ओम जग्यां कानी आंगळी करतो बोल्या ।

बात बिगड़ती देख प्रशासन फट पलटी मारी अर खरड़पंच नैं बोल्या, “आप सब परे हटो । यह प्रशासनिक मामला है । आप इसमें दखलंदाजी नहीं कर सकते ।”

दोनू पार्टी थोड़ीदार वास्तै मोळी पड़गी । स्यात वै आगै री रणनीति बणावण लागी ही । प्रशासन जेठारामजी री डैड बाँडी अम्बूलेंस सूं उतारण रो हुकम सुणायो । कर्मचारी तो जाणै हुकम नैं ई उडीकै हा । जेठारामजी री डैड बाँडी अम्बूलेंस सूं उतारनै धू-पटकी सारै ऊभी हाथरेहड़ी माथै ।

जेठारामजी बोल्या, “अरे नालायको ! कीं तो शरम करो । मरणो थानै ई है । थे कोई अमर कोनी रैयसो । कोरोना सूं मर्यो तो काई हुयो, हूं तो मिनख ! इयां दुरगति तो ना करो ।” जेठारामजी गळगळा हुंवता कैयो तो कर्मचारियां नैं पण झाळ आवै ही बेटां-पोतां माथै । “नालायक ऊभा-ऊभा मुंडौ पाड़ै । इयां नीं कै हाथ लगा लेवै । इयां कोरोना सूं मरस्यो तो मरस्यो ई नाजोगो !”

जेठारामजी री देह नैं रेहड़ी मांय नाखतां ई जगदीश रेहड़ी नैं ठरड़तो दाग देवण री जग्यां कानी व्हीर हुयो । लारै छोटियो बेटो ओम, दो पोता अर अेक पाड़ोसी । फकत पांच मिनख ।

“अरे नाजोगो ! बित्ती दूर तो म्हनै मोढां माथै ले जाओ, फेर ई थारौ बाप हूं । इयां काई डांगरां दाई ठरड़ता ले जावो ? कीं तो सरम-संको करो रे नाजोगो !” पण जीवतै जीय लोग जेठारामजी री बात नीं सुणी, मर्यां पछै तो सुणतो ई कुण ?

कमेटी रा मेंबर सलाह-मसवरौ करनै फेर आ ऊभा हुआ। वै किणी ई सूरत में अठै, खास करनै सैड तळै तो दाग हुवण देवण रै मूड मांय कोनी हा। पण जेठारामजी रा बेटा जेठारामजी री मिरत देह नै सैड कानी ठरड़ लेयग्या हा।

प्रशासन फेर पलटी मारी। अबकै वौ अटकळ सू सिटकळ मारण री तेवड़ी,
“प्रधानजी, आप समझदार मिनख हो। कालनै अखबारबाजी हुयसी। कै कोई मिनखपणै नाम री चीज ई कोनी बची? आप समझो बात नै।”

“पण साब! कोरोना पैसेंट रो?”

“हम हैं ना! आप चिंता क्यों करते हो?” प्रशासन कियों ई आ ब्याधी मुकावणी चावै हो।


प्रधानजी कीं ठंडा पड़्या, पण खरड़पंच पाणो मांड्यां ऊभा हा।

प्रशासन सलो मोड पर बीच-बिचाळै रै सिद्धांत री जुगत बिठावण री आफळ करै हो। जमदूत माथो पकड़्यां मिरतुलोक री दुरगत माथै अफसोस परगट करै हा। इत्ता बरसां मांय वां कदैई अँडो दरसाव नीं देख्यौ। घोर पापी सू पापी मिनख रो जीव लेयनै गया, पण घणै सन्मान साथै। जेठाराम तो बसपुगतां लाई किणी कीड़ी नै ई नीं संताई ही। अँडै सधीरै जीव री आ गत?

जेठाराम सूं और कोनी देखीज्यो। वो होळै-सी आपरी देह सूं उतर्यो अर नीची धूण घाल्यां बैठ्या जमदूतां कन्नै आयनै बोल्यो, “ल्यो आवो भाई लोगो, चाला!”

अचाणचक जेठाराम रै जीव नै कन्नै आयो देखनै जमदूत अेकर तो चिमक्या, भळे अफसोस करता बोल्या, “भाई म्हारो इण मांय कोई कसूर कोनी। म्हे तो धरमराज रै हुकम रा ताबेदार हां। म्हानै थारै सूं घणी हमदरदी है। म्हे तो बस इत्तो ई कर सकां कै थारी कपाळ किरिया हुवण ताई और थम सकां।”

“नहीं रे भाई! म्है मिरतुलोक मांय अेक मिनट ई थमणो नीं चावूं। जे म्है भर्यै भरम अस्पताळ सूं ई सीधो थारै कन्नै आ जांवतो तो औ सो-कीं म्हनै क्युं देखणो पड़तो! थे तो जित्तो बेगो होय सकै, म्हनै धरमराज कन्नै पुगाय दो। म्हनै तो वां सूं फगत अेक सवाल पूछणो है, “काई म्हारो मुसाणां मांय ई सीर कोनी?””





पूर्ण शर्मा 'पूरण'

हेरणी

जेठ रो महीनो। बाळै इण नै। कुण मांग्यो हो? पण दादो कैवता करसै मांग्यो लाडी। क्यामी? क्यामी क्यांरी, बिरखा खातर। जित्तो तपसी बित्तो ई बरससी। ठाह नीं कदसीक बरससी। जेठ उतरण चाल्यो पण हाल तो कित्रैई घिरेडो दीसै कोनी। घिरेडो छोड, कोई फोई चिलकती दीसै तो ई जीव टिकै। सिंझ्यां ढळी नै केई ताळ हुयगी। गुदळको-सो हुय रैयो हो, पण ताती बिसी ई चाल्यां बगै ही। आज तो जाणै सो-कीं राख करनै ई छोडसी। म्हे दोनुआं सिर माथै दुमालिया लपेट राख्या हा, पण कानां रा लवा सिलग्यां जावै हा। दोनू मतलब, म्हेँ अर नूवोडो सगो। बेटै रै ब्याह पछै पैलीपोत ई आया हा। घरां आज चेळको न्यारो ई हो। बीनणी तो राजी ही जकी ही, जोड़ायत रा ई पग कोनी मंडै हा। म्हेँ हांस दियो, “आज तो चकीजी फिरै...। पंजा ई कोनी मंडै नीं!”

“थोड़ी ताळ पछै थानै ई देख लेस्यां...।” जोड़ायत कद घाट घालै ही। अर कैवै ई साची ही, सगो आयेडो हुवै तो कीं खेचळ-पाणी रो तो फरज बणै ई हो। अर थोड़ी ई ताळ मांय बातां ई बातां मांय सगै साम्ही मूंडो चरको करण रो जिकर कर दियो। रिटायर फौजी माणस। किसी भींट ही। संकता केई ताळ तो ना-नुकर-सी करबो कर्या, पण घणो जरजरू कोनी करणो पड्यो। थोड़ी ताळ पछै म्हे दोनू ऊपर छत माथै बैठ्या हा। दिन तो अलबत्त छिपगयो हो, पण अंधारो हाल हुयो कोनी हो। आथुणै पासै कीं उजास जांवतो-जांवतो पग थामनै ऊभो रैयगयो हो जाणै। घणी उडीका-उडीकी कुण करै। छेकड म्हेँ डोळी सारै धरेडो स्टूल लेय आयौ अर दोनू माचां बिचाळै जचा लियौ। बाकी रो सारौ सामान त्यार हो ई।

ठिकाणो :
प्राथमिक स्वास्थ्य केंद्र
रामगढ़, तहसील-नोहर
जिला-हनुमानगढ़ (राज.)
मो. 9828763953

दो एक पैगड़ा ताई तो म्हे इल्ली-बिल्ली करता रैया। फलाणौ रिस्तेदार इयां है...धीकड़ौ बियां। रिस्तेदारियां मांय थब्बा खांवता-खांवता थोड़ी ताळ पछै म्हे दोनूं देस-विदेसां घूमण लाग्या अर छेकड़ आं सगळी चीजां सूं ऊपर हुंवता गया। दूसरो अधियो खोल्यां पछै तो म्हे अठै छत माथै हा ई कोनी। छत माथै काई, म्हे तो देस मांय अर सावळ पूछो तो इण दुनियां मांय ई कोनी हा। धरती सूं ऊपरोऊपर जठै बायरो कतैई ठंडो हो, म्हे लगोलग बध्यां ई जावै हा। सगो केई ताळ तो संको मानबो कर्या, “ना... ना... बस करो। और नीं...।” पण दो-अेक ठरगल-सा लियां पछै तीजै रै आप ई हाथ घाल लियो। अर पछै म्हे बठै हा जठै सुरग बतावै। अबै म्हे सुरग मांय चालती ठंडी पून रा दावा लूटै हा।

...पण अै दावा घणी ताळ ताई कोनी लूटीज्या।

“अरे... मार दियो रैय...SS! अरे छुटावो रे...।”

“लै...SS...और लै.. रांड...।”

“अरे... गाम... राम रैयS...!”

म्हे दोनूं जिता ऊंचा गया हा बठै सूं हेठै आवण मांय दर ई जेज कोनी लगायी।

“कुण है?” सगो जी पूछ्यो।

म्हें उत्तरादी पासै गळी रै मोड़ परलै घर कानी ख्यांत्यौ। अठै सूं कीं दीसै तो कोनी हो पण म्हनै ठाह हो आवाज बठै सूं ई आवै ही। आ कोई आज हुयेड़ी ताजा बात तो ही कोनी। रोजीना रो नाटक हो।

“बो धोळियो माळियो दीसै है नीं थानै... बीं रै परलै पासै रो घर है।” म्हें सगो जी नै अैन सही-सही लोकेसन बतायी। भळै बोल्यो, “बेकार है स्साळौ। रोज कूटै लुगाई नै।”

“क्यामी?”

अब क्यूकर कैवूं सगो जी नैं कै दारू पीयां पछै क्यामी कूट्या करै? बियां सुरगां सूं आयां पछै ताती तो इयां ई लागै ही। म्हें दूजी ढाळ कैयो, “लायण लिखायनै ल्यायी है ओ...।”

“आ तो कोई बात कोनी हुयी।” सगो जी इतराज कर्यो। कर ई सकै, रिटायर फौजी है। इयां इन्याय कियां देखीजै।

पण म्हे तो रोज ई देखां। बाण पडरी है। लायण लुगाई गरळवै जद अेकर-अेकर तो रीस आवै अर भाजनै छुटावण ई जावां पण जायां काई हुवै, लगैटगै लेणै रा देणा ई पडै। गाळ सुणनै पूठा आय जावां। गाळां सूं गूमड़ा तो कोनी हुवै पण सुणीजै तो कोनी। अर बीं जुवान कनै तो बस गाळां ई है। जुवान? जुवान क्यारो... जूतियै मांय ठोकणआळो खबीडो हुवै जाणै। काळो अर कुरदांतळो न्यारो। लायण लुगाई कानी देखां तो रीस आवै। कुण हो निरभाग... जको इण सूधी गाय नैं पजा मार्यो। लुगाई सूधी है... पण पैलां तो औ धोरी ई

सूथो हो। ब्याह ताई तो इण रै मूंडै मांय जीभ ई कोनी ही। ना कोई बैल हो। बीड़ी तकत कोनी पीवतो। नौकरी तो ब्याह सूं साल खंड पैलां ई लागग्यो हो। साची बात तो आ ही कै ब्याह ई बीरी नौकरी रै कारण ई हुयो हो। नींतर इण गेजै नै कुण बूजी देवै हो? अर पैप बरगी इसी बीनणी बारणै पड़ी ही ना! हाथ लगावै तो मैली हुवै। दो टाबरां री मां है पण लागै कोनी। कांस मांय जीवै पण कानी देखै तो दो घड़ी देखबो करो। जीव कोनी धापै। बेमाता घड़ण लागी तो जाणै सगळी रीझ अटै ई लगादी जको ई कानी देखै, बाको पाड़्यां देखतौ ई रैय जावै। ब्याहवली आयी जद तो पूरै बास-गळी मांय हाको माचग्यो हो। अर केइयां तो मूंडै माथै ई कैय दियो हो, “लै... लै... खांड री बोरी रै गंडक लागग्यो।”

ब्याह रै दो साल मांय-मांय ई मां-बाप दोनूं राम नै प्यारा हुयग्या अर ओ गंडक अबै सेर बणण लाग्यो। सरू-सरू मांय तो कदे-कदास ई बणतो। कीं रोका-टोकी ई हुयी। अक-दो बरियां सासरैआळा ई आया। समझावा-बुझायी ई करी पण... समझणो हुवै तो समझै नीं! सगळा कैय-सुणनै धापग्या तो अक दिन बण खुद कैय दियो। आ कद सुहावै। “लै... लै... थूं कुण है म्हनै कैवणआळी? खूब रैचक मचायो घरां।” घणी पीयेड़ी कोनी ही, पण नाटक घणो ई कर्यो। लायण अबोली रैयगी पण कित्ताक दिन? रोज काळजै माथै आरी चालै तो चुप्प रैयीज्या तो कोनी। भळै अक दिन साम्ही हुयली। केई ताळ पाणो मांड्यो पण छेकड भाईडै हाथ काढ लियो। बस... अकर काढ लियो तो काढ लियो। बाण पड़गी। नित री पीवणी अर नित री लड़ाई करणी। थोड़ी पीवै बीं दिन ई लडै अर बोहळी गाळै बीं दिन ई। लड़ाई करणी अर लायण नै कूटणी जाणै बीं रो तैयसुदा काम हुयग्यो।

“जूतांआळा कोनी?”

सगो जी रो मांयलौ फौजी जाणै अचाणचक ई हाथ मांय बंदूक लेयली।

“आओ चालां।”

“बावळी बात कोनी कर्या करै ओ...।” म्है सगोजी नै थामणौ चावूं पण सगोजी कद थमै। कैयदी तो कैयदी।

“ओ रैय... मार दियो रैय...!”

‘अरे मरज्याणा छोड दै...।’

“अरे डाकी छोड दै...।” लुगाई रो कळळाटो सुण्यां ई जावै हो।

म्हे दोनूं पेड़ियां-पेड़ियां हेठै आया अर उतावळ करनै कूंटआळै घर साम्हीं पूग लिया। म्हे पूग्या इत्तै तो पूरो बास पूग लियो... राणोराण। सगळ्य गळी मांय भीतां सारै ऊभा मजा लेवै हा। हां ...घणकराक मजा लेवण खातर ई आवै हा रोज। केई बाण मुजब अर

केई मजबूरी मुजब । कैयां-सुण्यां कीं नीं बट्टे तो मजबूरी नैं मजा मान लेवौ भलाई । पण साची बात तो आ ही कै लेवै सगळा मजा ई हा । म्हे ई रळग्या इण भीड़ मांय ।

पण ना... । म्हे नीं फगत अकेलो म्हे ई । सगोजी म्हारै सागै कोनी हा ।

“थारी काळी गाय हूं रैय... ।”

“अरे छोड दे राकस... ।”

“अरे ना मार रैय... जुलमी... ।” लुगाई रोयां बगै ही अर साथै ई गाळ टोक्यां बगै ही ।

भाइडै हाथ मांय अेक कामडी लेय राखी ही अर लेद्देमार लुगाई रै आवै बियांई ठरकावै हो अर साथै मूडै छुटी गाळ ई ।

“लै रांड... लै और लै... ।”

“अरे छोड दे... अरे थारै टाबरां री मां हूं रैय... ।”

“हफ्फ...SS ...टाबरां री ...मांS... किण रै... टाबरां री ? ...जाणै म्हे कीं जाणूं कोनी... हें... ?”

अर सटाक...SS...कामडी लुगाई रै मगरां माथै सरडकाई ।

“ओ रैय... मार दियो रैय... कमीण... । अरे छुटावो रैय... गाम...राम छुटावो... अरे सगळा ई मरग्या काई... ?”

कामडी री चोट साथै ई लुगाई जोर सूं कूकी अर भींत साम्हीं खड्या लोगां कानी हाथ करनै गरळई ।

केइयां रै करण-करण-सी हुयी, पण हाल्यो कोई कोनी । कीड़ी-सी तो म्हारै ई चढै ही, पण आंख्यां साम्हीं लारला चितराम सैनपान बरजै हा ।

महीनो-अेक ई हुयो हुयसी । रोज-रोज रै इण तोतकरासै सूं आंती आयेडा सगळा बासआळां अेक राय करी कै थाणै मांय परचो देय देवां । दूजै दिन परचो देय आया । पुलिस ई आयी । पण पुलिस इयां सादै-बुधै रै काई कर सकै ? भाईडै रै मन मांय ठाह नीं काई भावी बोली कै तीन-च्यार दिनां ताई जाबक ई सौंफी रैयो । पछै अेक दिन पीयली । अर बो ई ब्याह अर बै ई गीत । बास तो भेळो हुवणो ई हो । भाईडै नै कोई टोकै बीं सूं पैलां ई बास नैं आडै हाथां लेय लियौ बण ।

“म्हें भोळो कोनी ...थे समझौ इयां ई लटर है ...सो जाणूं थे क्यामी परचो दियो... हां... हां सो जाणूं ...म्हें ...पण ...म्हें ...म्हें थारली आ चाल कामयाब कोनी हुवण देवूं... थे तो इणनै चाबणी चावो... काची नैं ई... आछी लागै... थानै आ ...आछी ... ।”

अर बास रो मूंडो इत्तोक हुयग्यो । लुगाई-पताई अर छोरी-छापरियां बिचाळै ऊभा मोट्यारां माथै जाणै हजारूं मण पाणी पड़ग्यो ! थोड़ी ताळ पछै गळी मांय कोई कोनी हो ।

भाईडै रै आज रै नाटक सूं... बास रै कितीक करण-करण हुयी ठाह कोनी, पण सगोजी तो अेकदम ई स्यारै बरगा हुय लिया ।

“लै... लै, थूं अेक ई सेर जाय्यो है काई अठै ? लुगाई नै मारतां सरम कोनी आवै... नीच ?” अर सगोजी भाईडै कानी लप्या । कानी आंवता देखा, भाईडै गाळ ठोकी सगै नैं अर हाथ मांयली कामड़ी हलाई, पण सगो तो फौजी माणस हा । इसी कामड़ी घणी देखेड़ी ही । बरोबर अंगरेजी मांय गाळ ठोकी अर भाईडै री गिच्ची झाल ली ।

फौजी माणस । जोर रो काई नेप ? अर फेर इन घड़ी तो हुवै ई कियां हो । ताजा-ताजा ऊपरियां आयेड़ा हा । भाईडै नैं धक्को दियो तो थोबी रेत मांय टिकी जायनै । फेर ई किस्यो थम जावै । झोला खांवतो ऊभो हुयग्यो, बियां ई गाळमगाळ । मूंडो रेत सूं भरेड़ो । भाईडो टिटण दाई पूठो चालै हो ।

“अबकै आई थूं... हप्फ... भैण... ।”

लुगाई अबै कंवळै सारै ऊभी ही अर बारणै मांय दोनूं टाबर । बाबै नैं कूटीजतां देख बै होळैसीक सरकनै आपरी मां कनै आयग्या । पण मां बां कानी कोनी देख्यो । देख्यो लोगां ई कोनी । सगळी आंख्यां तो फौजीसाब अर सेर भाईडै कानी देखै ही ।

भाईडै पाछ कोनी ली अर सगोजी नैं सूगली-सूगली गाळां ठोक्यां बगै हो । पाछ सगोजी रै मांयलै फौजी ई कोनी ली । बै आपरी बंदूक साम्यां दे-तैरै री दे-तैरै री गोळ्यां ठरकायां जावै हा । पण भाईडै रै कोई फरक ई कोनी पडै हो । भाईडो मार खायां बगै हो अर गाळ ठोक्यां बगै हो ।

...पण फरक लुगाई रै पड़ग्यो ।

“जुरत... कोनी है... मारणै री... ।” अचाणचक ई लुगाई रै मूंडै सूं बोल गरज्या । अेक जोर रो धमाको हुयो जाणै अर फौजीसाब री तड़ातड़ बाजती गोळ्यां रो खड़को मांय दबग्यो ।

“थूं कुण है... मारणआळो... म्हारो धणी... म्हारै मारसी तो मारसी... ।” हेरणी लुगाई अबै नारड़ी हुयगी ही ।

फौजीसाब री बंदूक छूटगी अर बै हा बटै ई जड़ हुयग्या । गळी मांय जाणै सांप सूंघग्यो । थोड़ी ई ताळ मांय गळी खाली हुयगी, पण सगोजी सूं पूठौ आवणो भारत हुयग्यो ।





अमीर अहमद सुमन

भलो मिनख

वा लाण बापड़ी काठी दुखियारी ही अर होवै भी क्यूं नीं ? घरधणी दारूडियो जको हो । नसै मांय घरै आवतां ई अैड़ी राड़ मांडतो कै मत पूछो बात ! घरां रै मांय पसस्योड़ी सांयती मांय जाणै गाजतो घोरतो बिजळो पड़यो हुवै । अैड़ी खोड़ीलायां करतो भस-भसाटा सागै बरतण-भांडा बारै फेंकतो थको गाळियां रै सागै ही लुगाई नैं मारणी-कूटणी जाणै उणरो नतनेम बणग्यो हो । अेक दिन तो जाणै सगळी ई हदां पूरी कर दी । आधी रात रा पीयोड़ो घरां आयो अर लुगाई नैं मार-कूट'र घर सूं बारै काढ दी । वा बापड़ी सडक माथै ऊभी रोवै-झींकै ही । उणी टेम पाड़ोस मांय रैवणियो अेक भलो मिनख उणनैं आपरै गैराज माथै रैवण सारू ठौड़ देय दी । सगळा मिनख उण भला मिनख रो घणो मान करै हा अर कैवण लाग्या कै लाई घणो आछो काम कर्यो, नीतर बापड़ी जवान लुगाई रात मांय कठै जावती ! बिचारी नैं रैवण सारू ठौड़ मिलगी ।

वा दुखियारी मिनखां रै घरां बुहारो-पौँछो करती आपरी गिरस्थी नैं चलावण री खैचळ करण लागी । अेक दिन म्हैं उणसूं पूछ्यो कै उण भलै मिनख रा गैराज मांय अबै तूं सुख-चैन सूं अर इज्जत सूं रैय रैयी है नीं ? वा म्हनैं घणी ताळ ताई घूरती रैयी अर पछै मंदरी आवाज मांय बोली, “वो दारूडियो हो, आ सगळा जाणै हा, पण औ गैराज वाळो कितरो भलो है, आ फगत म्हैं ईज जाणूं हूं।”

म्हारै मूंडै सूं बोल फूटबा रै पैली ई वा बटै सूं ब्हीर होयगी ।



ठिकाणो :

‘द ड्रीम’

सुमन मार्ग, बहीर

टॉक-304001

मो. 9414221204

भाजी कोनी, हारगी कल्लो

यूं तो उणरै दो भाई अर अेक छोटी बैन ही। सुण्यो तो हो कै उणरो बाप भी हो, पण उणनैँ घणा थोड़ा मिनख देख राख्यो हो। भाई मोटा हा। वै टाबर कद हा, आ तो ठाह कोनी, पण वै अचाणचक ई मोटा होयग्या हा। सैंग दिन बीड़ी, गुटको अर सट्टा खेलबा मांय ई लागयोड़ा रैवता। बैन तो घणी नान्ही ही अर हाल ताई साव टाबर ही। मां रै सागै घरां-घरां मांय जावै ही। मां काम पर जावती बेळा उणनैँ सागै ईज राखती ही। घर री दाळ-रोटी मां अर उणसूं ईज चालै ही। आ बेलदारी करै ही, मजूरी करै ही, जवान होबा पाछै भी टाबरां ज्यूं भोळी बातां करै ही, जिणसूं सागै काम करणिया बेलदार अर मिस्तरी उणसूं दिन भर हंसी मजाक करै हा।

बडो मिस्त्री उण रो घणो ध्यान राखै हो। उणरी घणी उमर होयगी ही, जिणसूं उण मांय दुनियादारी री समझ ही। इणसूं वो इण रो बेसी ध्यान राखै हो। वो दिन भर उणसूं पाणी भरावण रो ईज काम करावै हो। वो जाणतो हो कै लुगाई फावड़ो कोनी चला सकै। उणनैँ घरवाळा कल्लो कैवता, इण लिहाज सूं सगळा आड़ोसी-पाड़ोसी अर मिस्त्री-मजूर भी कल्लो ईज कैवता हा। कल्लो री जवानी, उणरी मीठी बंतळ, चंचळता धीमै-धीमै च्यारूंमेर चावी होवण लागगी। मिनखां नैँ वा रमेकड़ो लागती ही। बडो मिस्त्री जाणतो हो कै आ सगळै परिवार नैँ रोट्यां री देवाळ है। सगळा री रोट्यां ई नीं, भाईड़ां री बीड़ी-तंबाकू भी उणरै ताण ईज आवती ही। कल्लो ई अबै बडी तो हायेगी ही, पण उण मांय हाल दुनियादारी री समण नीं बापरी ही। आ बात बडो मिस्त्री आछी तरै सूं जाणतो हो।

बडै मिस्त्री नैँ अेक दिन अचंभो हुयो कै हमेस हंसबा वाळी छोरी कल्लो री आंख्यां मांय आज आंसू कियां तिरै है ? वो उणनैँ पूछ्यो, “कल्लो! कांई हुयो ?”

आ सुणतां ई वा फाट-फाट'र रोवण लागगी अर बोली, “जकै दिन भी पगार मिलै है, म्हनैँ म्हारा भाईयां री मार खावणी पड़ै अर मां भी उणां रो ईज पख लेवै।” कैय'र वा घणी देर तांई रोवती रैयी।

दूजै दिन कल्लो काम पर कोनी आई। तीजै दिन भी कोनी आई अर ठाह पड़ी कै कल्लो रो कोई पतो कोनी। जवान छोरी रै गायब होवण सूं भांत-भांत री चरचा होवण लागी। बडो मिस्त्री भी घणो उदास होयग्यो। वो सोचै हो कै आपरी पाळ्योड़ी चिड़कली नैँ उण गमाय दी। अचाणचक उण रो बेलदार हंसतो थको कैवण लायो, “उस्ताद! कल्लो भाजगी।”

बडो मिस्त्री बेलदार नैँ रीस मांय घूरै हो। इणसूं बेलदार डरपग्यो। अबै बडै मिस्त्री री आवाज आई, “अरे भाजी कोनी कल्लो, कल्लो आपरा घरवाळां सूं ईज हारगी।”

बडै मिस्त्री री आंख्यां मांय ई पाणी तिरण लागग्यो।





संजय पुरोहित

झपिया म्हराज

म्हें म्हरै टापरै रै सारै ई मूंडो घाल'र काचै तावडै री गरमास रै सागै चाय रा सबडका लेवै हो। इणी टैम अेक मोटरसाइकिल रै साँकर नैं आपरी अणूती चर्बी सूँ अंडरप्रेसर करतां थकां झपिया म्हराज आय टपक्या। म्हें म्हराज नैं देख्या। रामा-स्यामा कस्या।

पैली आप हुकम नैं औ तो बताय ई दूँ कै झपिया म्हराज कुण? झपिया म्हराज अेक जबर मिनख है। अखबार हुवो कै टीवी, सदीव खबरां मांय रैवै। अखबारां मांय छपण आळी सौ फोटुवां मांय सूँ पचास में तो कठै न कठैई आपरो मूंडो घाल्योडा दीख ई जावै। आ वारी कला है। वारी साईस है। वारी कैमेस्ट्री है। वां रो मैनेजमेंट है। किणी संस्था रो कोई भी जळसो हुवै, म्हराज पंचायती में हाजर। वै केई संस्थावां मांय माडाणी घुस्योडा है। केई संस्थावां तो वै खुद ई बणाय राखी है। इन्नै-बिन्नै अर ठाह नीं किन्नै-किन्नै आप टूँसीज्योडा है। श्मसाण कल्याण समिति सूँ लेय'र संस्कृति विणास न्यास हुवो, भैंसाबाडा उन्नति मंच हुवो कै पछै उपेक्षित लिखारा मोरचो हुवो, हरेक जग्यां म्हराज किणी न किणी रूप में बिराज्योडा ई है। वारी लीला अपरम्पार।

झपिया म्हराज कोई नसौ-पत्तो नीं करै। बस अेक ई नसो है—वो है खबरां रो, फोटुवां रो। इण नसै रै मिस म्हराज फोटोग्राफर अर पत्रकारां खातर अणूतो सन्मान राखै। टेम-टू-टेम वांनै राजी करता रैवै। म्हराज बाळपणै सूँ ई झपिया है। म्हराज काची उमर सूँ ई हरेक चीज झप'र हासल करी। इण कारण सूँ ई वांरो नांव झपिया म्हराज पड्यो।

ठिकाणो :
धोबी धोरा
बीकानेर (राज.)
मो. 7014073564

मौकै पर चौको मारण में म्हाराज रै कोई आसै-पासै ई नीं फटकै। कला, साहित्य, संस्कृति, समाजसेवा आद हरेक फील्ड मांय झपिया म्हाराज हाथ-पग मार्या है। डिग्री, नौकरी, नांव, रुपियो सै-कीं झपिया अर झप रैया है। कोई इसो खूणो नीं छोड्यो जिणसूं झपिया म्हाराज कीं झप्यो नीं हुवै। भांत-भांत रै कामां रा बंटाधार कर्यां पछै अबार झपिया म्हाराज साहित रो कबाडो करण दूक्योडा है।

असल में झपिया म्हाराज क्रिकेट रै आलराउंडर खेलाड़ी री भांत है। वै हरेक मौकै नैं परोटण रो जबरो हुनर राखै। वै आपरै कुचमाद सूं तिरियां-मिरियां हुयोडै माथै सूं हर भांत री बैटिंग, बॉलिंग, फील्डिंग तो करै ई है, पण सागै विकेटकीपिंग भी करै। म्हैं झपिया म्हाराज रो फैन हूं। झपिया म्हाराज भी म्हैं आपरै सागी काकै जित्तो अणूतो सन्मान देवै।

अबै पूठा मैन टॉपिक माथै आवूं। म्हैं झपिया म्हाराज नैं हालचाल पूछ्या। झपिया म्हाराज आपरी मोटरसाइकिल केजरी स्टाईल में यू-टर्न करी। वै यू-टर्न लेवण में ई उस्ताद है। मोटरसाइकिल खड़ी करी। नेडै ई पान री दुकान सूं गुटखै रो पाउच लियो। म्हारी उमर रो लिहाज करता थकां चरणधोक करी। म्हैं मुळक्यो। झपिया म्हाराज आपरो मोबाईल काढ्यो। आ तो म्हैं आप हुकम नैं बताय चुक्यो हूं कै झपिया म्हाराज री कमजोरी फोटू है। वां रै कुचमादी दिमाग मांय चौबीसूं घंटा फोटुवां ई घूमती रैवै। म्हाराज म्हारै सागै सेल्फी ली।

म्हैं भी राफां चवड़ी कर 'र मुळक्यो। इण पछै म्हाराज नैं पूछ्यो कै अबार काई मांय लाग्योडा हो? झपिया म्हाराज कत्रै ई पड़्यै अेक मुड्डै नैं आपरै कानी खींच्यो अर उण माथै आपरी मोटी जूर तसरीफ धर दी। बापडो मुड्डो जीव होवतो तो अवस चिरळावतो। खैर!

झपिया म्हाराज आपरी अबार री प्लानिंग बताई, “काका! अबलकी अवार्ड झपण री खैचळ कर रैयौ हूं।”

म्हैं मुळक्यौ, “अरे झपिया म्हाराज, थे तो धोबा भर-भर इत्ता अवार्ड झप न्हाख्या हो, अबै किसो अवार्ड रैयग्यो जिको थारी निजरां नीं चढ सक्यो।”

म्हारी बात पूरी हुवण सूं पैलां ई झपिया म्हाराज कैयो, “अरे काका, छोटिया अवार्ड तो घणा ई झप लिया। अबलकी मोटो अवार्ड झपण री जुगत मांय हूं। नेशनल अवार्ड।”

म्हैं हांस्यो, “झपिया म्हाराज! मोटा अवार्ड री मोटी सैटिंगां हुया करै। बठै थारै लोकल लेवल री दाळ नीं गळे।”

झपिया म्हाराज री अेक और खूबी तो म्हैं आपनैं बतावणी ई भूलग्यो। वै नेगेटिव बातां नै आपरै कत्रै फटकण ई नीं देवै। म्हारै कैवतां पाण पडूतर दियो, “अरे काका!

सुभ-सुभ बोलो। गोटियां फिट करण मांय ई लाग्योड़ो हूं। बस, थे म्हारै माथै आसीस रो हाथ धर्योड़ो राख्या।”

म्हें इण बात सू राजी हुय र वां रै माथै पर लाड सू हाथ फेर्यो। वां रै लाल-लाल टमाटर री भांत पळको मारता गाल माथै थपकी दी अर पूछ्यो, “पण भतीज, म्हें सुण्यो है कै अवार्ड मांय कमेटी हुवै। कमेटी मांय मेम्बर हुवै। वांरा वोट हुवै। वांनै राजी करणो पडै!”

झपिया म्हाराज हांसता बोल्यो, “काका। थारो औ भतीज बादस्या काची गोट्यां कोनी खेली है। मैन-टू-मैन सेटिंग कर रैयो हूं। आधा परदा तो सैट कर लिया है, बाकी नै ई आपरै चकारियै में लेवण री खैचळ कर रैयो हूं। इणी कारण अबार केई-केई जातरावां कर रैयो हूं।”


“स्याबास!” म्हें म्हाराज री पीठ थपकाई अर समझायो, “देख झपिया! अवार्ड मांय केई बार भीतरघात हुय जावै। पैली भीतरघात करण आळां नै ईज सैट करणो जरूरी हुवै, नीतर पछै कात्यो-पीज्यो सै कपास हुय जावै।”

आ सुणतां पाण झपिया म्हाराज म्हारै कान रै नेडै आय र होळै-सीक कैयौ, “काका! म्हें पतो कर लियो है। जकां सू भीतरघात रो डर हो, वै तो लारला दो-अेक सालां मांय अवार्ड झप चुक्या है। वै भी म्हारै अवार्ड झपण मांय मदद कर रैया है।”

झपिया म्हाराज री बात मांय दम हो। म्हें म्हारो भोड हिला र हंकारो भर्यो। म्हाराज नचींता हा। वां रै संकळप री त्यागत म्हारै साम्हीं पळकै ही। वांनै पक्को पतियारो हो कै अबलकी नेशनल अवार्ड वांरो ई हुसी, इणमें कोई मीन-मेख कोनी।

बईर हुवती बगत झपिया म्हाराज फेरूं म्हारै चरणधोक करी।

म्हें आसीस दी, “भव झपिया उतिष्ठ, जागृत!”





डॉ. मंगल बादल

लोक रै आलोक मांय लोककथावां

दुनियां री हरेक भासा अर समाज में लोककथावां रो आदूकाल सू प्रचलन है। लोककथावां उण जमानै सूं लगोलग सफर करती आवै जद मिनख नैं आखर ज्ञान भी कोनी हुया करतो। अैं कथावां अेक पीढी सूं दूसरी पीढी, अेक देस सूं दूसरै देस, अेक जबान सूं दूसरी जबान, अेक समाज सूं दूसरै समाज में भूंवती-भटकती, खुद रै मांयनै कितरा बदळाव समोवती अर यायावरी करता थकां कितरी लंबी जातरा कर आपणी पीढी ताई पूगी है। आप टाबरपणै में लोककथावां आपरी दादी-नानी सूं चायै खुद रै घर में ई सुणी हुवै पण आं रै सफर रो इतिहास घणो जूनो है। अैं आपणी पीढी ताई श्रुति परंपरा सूं ई आई है। औ भी कैयो जाय सकै कै अैं वेदां जितरी ई जूनी है। आधुनिक जुग में विदेसी भासावां री देखादेखी भारतीय भासावां में भी लोककथावां नैं लिख रै सहेजणै री प्रक्रिया सरू हुई। अैं लोककथावां आज भी उतरी ई लोकचावी अर महताऊ है जितरी आपरै सरूआती काल में हुया करती। केई लेखकां इण कथावां रो कीं रूप बदळ अनै जुग रै अनुरूप ढाळणै री कोसिस भी करी है। बगत रै साथै बदळाव लोककथा री विसेसता है इण कारण आं रै लिखित रूप नैं लेय रै केई विद्वानां नैं अंतराज भी है। बांरो मानणो है कै पुराणा मनीसी भी तो आंनै लिखित रूप देय सकै हा, पण इण कारण कोनी दियो कै इण भांत करणो पुराणी परंपरा सूं छेड़छाड़ है। अैं लोक री वस्तु है। लिखित रूप में आयां पछै आं में कोई बदळाव कोनी आ सकै जद कै लोकथावां तो बगतै नीर सरीखी हुवै। जियां ठैरियोडो पाणी गंदो हुय जावै बियां ई लोककथावां रै सरूप में भी ठैराव आ जावै। लोककथावां में जुग रै अनुरूप बदळाव बां रो फुटरापो है, कमी कोनी। आं नैं सिर्फ टाबरां रै मनोरंजन रो साधन बतायनै हासियै

ठिकाणो :
शास्त्री कॉलोनी,
रायसिंहनगर-335051
मो. 94149-89707

माथै सरकाणो ठीक कोनी, क्यूँके असलियत तो आ है कै आं लोककथावां में मिनख सभ्यता रै विकास रो इतिहास भी गूथिजेड़ो है, साथै ई अँ किणी बगत मनोरंजन रो जबरदस्त साधन ही।

दुनियां रै हरेक देस अर भासा री लोककथावां रा घणकरा 'क तत्त्व आपां नैं अेकसा मिलैला। जियां कै किणी राकस कानी सूं किणी राजकंवरी रो अपहरण, राकस री ज्यान किणी दूर जग्यां अेक पिंजरै में बंद सूवै में हुवणी, उडणखटोला, झरझरकंथा, जादूगर, भूत-पलीत, चुडैल-डाकण आद आं रा पात्र हुवै। पसु-पंछियां री मिनख सूं मिनख री भासा में बातां करणी भी आम बात है। म्हें इण बात माथै गैराई सूं विचार कस्यो कै विकासवाद रै सिद्धांत माथै विस्वास करां तो सरुआत में मिनख हुय सकै पसु-पंछियां सूं बातां भी करतो हुवै। औ महज संजोग कोनी कै आंनै देख कदे-कदे तो लागै, अँ सगळी लोककथावां अेक ईज क्षेत्र री है। आं में सिरफ पात्रां रा नाम ई बदळेड़ा लागै। बधती आबादी रै दबाव रै कारण आप-आपरी सुविधा मुजब मिनख दूर-दूर हुंवता गया, पण बै आपरै साथै अँ लोककथावां भी लेयनै गया। देस अर काल रै मुजब आं कथावां में बदळाव हुंवता रैया। इण में स्थानीय विसेसतावां जुड़ण रै कारण अँ मूळ सूं कीं अळगी दीखण लागगी, पण असली तत्त्व सागी रैया। लोककथा प्रस्तुत करणाळै री भासा अर कैवण रै अंदाज में भी फरक हुवण रै कारण बदळाव आंवतो गयो। आं रो लगोलग बिगसाव श्रुति परंपरा सूं हुंवतो रैयौ है। लोककथा प्रस्तुत करणाळो आपरी बुधी अर भासा रै मुजब भी उणमें कीं और जोड़ या घटा दिया करतो। इण भांत अँ कथावां आगै बधती रैयी। क्षेत्रीयता, जातीयता, समाजिक वातावरण आद रो असर आं माथै पड़तो रैयौ। इण विसेसतावां रै चालतां ई पुराणै मनीसियां आंनै लिपीबद्ध कोनी करी।

हरेक भासा रो अेक लोक हुवै। कोई भी लोककथा उणरै आलोक में ई आपरो बिगसाव करै। उण क्षेत्र री परंपरावां रीत-रिवाज आद उण रा अटूट अंग बण जावै। केई विद्वानां रो तो अठै तांई कैवणो है कै लोककथावां में भी उणरै जुग रो जथारथ हुवै। उण जमानै में जद राजतंतर हुया करतो तो राजा निरंकुस हो। उणरो वचन ई कानून हुया करतो। उण जिको कर दियो या कैय दियो बो आखरी अदालत रो फैसलो हुया करतो। अपराध री सजा रै फळसरूप हाथ-पग कटवायनै चौरंगियो बणा देणो, सँपरिवार घाणी में पिलवा देणो, सूळी चढा देणो, देसूंटो देणो आद उण जुग री दंड संहिता में हा। आं लोककथावां में कठै-कठै ई बांरी निरंकुसता अर जुल्म रो विरोध भी मिल जावै। असल में उण जुग में सीधो-सीधो तो राजावां नैं आदेस, निरदेस या सलाह दी कोनी जा सकती, इण कारण प्रतीकां में कैयो गयो है। आ अलग बात है कै आज रै श्रोता या पाठक नैं बै प्रतीक समझ में नैं आवै अर बो बांनै कोई चमत्कार, कारनामो या कल्पना समझ लेवै। उण जुग में राजा नैं भगवान रो प्रतिनिधी मान परजा उणरी हरेक आज्ञा रो पालण कस्या करती। राजा भी आपरी परजा नैं उलाद री भांत मानतो। जिको राजा अत्याचारी हुंवतो उणरो बरणाव भी आं

लोककथावां में किणी न किणी रूप में मिल ई जावै। कोई चायै कितरो ई तागतवर हुवै उण रो तोड़ कटै ना कटै मिल ई जावै। अँडै लोगां नै प्रकृति भी सजा देय देवै। केई लोककथावां अँडी भी है कै उणरै राकस पात्र री ज्यान सात समंदर पार किणी पींजरै में बंद सूवै में हुवै जिकै रै च्यारुंमेर सखत पहरो है। इण बात रो बेरो सिवाय उण राकस रै और किणी नै कोनी, पण बो भी अेक दिन नसै में या घमंड में भर्योड़ो औ भेद अपहत राजकंवरी नै बता देवै। उण रहस्य नै मोमाखी बणेड़ो राजकंवर सुण लेवै। पछै बो सूवै नै पकड़'र मार देवै जिकै सूं राकस भी मर जावै। अँ जादातर कहाणियां सुखांत है। आं लोककथावां में लुगाई री माड़ी हालत अर रणिवासां में हुवणाळै कळेस रा चितराम भी मिलै। राजा किणी छोटी-सी बात माथै ई रिसाणो हुयनै किणी भी राणी नै दुहाग दे दिया करतो। लोककथावां में प्रेमकथावां भी घणी ई है। हरेक राजा रै अेक सूं जादा राणियां हुया करती। कैवण रो मतलब है कै सामरथवान लोगां में अेक सूं जादा ब्याह करणै रो रिवाज आम हो। राजा रात रै बगत भेख बदळनै परजा रा हाल-चाल जाणनै सारू महलां सूं बारै भी निकळ्या करतो। अँडी ई और घणी बातां है जिकै सूं तथाकथित जुग रै जथारथ रो बेरो लागै।

अँ लोककथावां घणी मनोरंजक है। अेक जमानै में गांवां में तो अँ मनोरंजन रो स्सै सूं बडो साधन ही। रोचक तो इतरी कै श्रोता अेकर सुणण सारू बैठगयो तो बिचाळै छोड'र कोनी जा सकै। बीसवै सईकै रै सातवै-आठवै दसक ताई गांवां रै हरेक घर में लोककथावां रो वरचस्व हुया करतो। गरमियां री रुत में तो गांव रै किणी घर री चूंतरी माथै या बाखळ में लोग भेळा हुय जावता अर बात कैवणियो बातपोस बात सुणावणी सरू कर दिया करतो। बातां रै बहानै घर-परिवार रै साथै-साथै रिस्तेदारी अर दुनियांदारी री भी बातां हुय जांवती। समाचार मिल जांवता। बां दिनां बातपोसां रो भी समाज में अेक खास दरजो हुया करतो। मसहूर बातपोसां नै तो पईसा देयनै लोग दूर-दूर सूं बुलाया करता। राजा, नवाब, जर्मीदार अर रईस लोगां रा आप-आपरा बातपोस हुया करता जिकां री बै आरथिक मदद भी कर्या करता। बियां आपणै समाज में बां दिनां हरेक मिनख-लुगाई रै केई-केई लोककथावां याद हुया करती। बांनै बै आगली पीढी नै सूप दिया करता। इण भांत लोककथावां अेक पीढी सूं आगली पीढी ताई चली जांवती। सियाळै मांय तो बात कैवणियां अर श्रोता किणी खाली जग्यां धूई जगायनै उण रै च्यारुंमेर बैठ जाया करता। आधी-आधी रात या इण सूं भी देर ताई बातां चालती रैवती। केई बातां इतरी लंबी हुया करती कै केई-केई रात धारावाहिक रै रूप में चाल्या करती। आपनै ध्यान हुवैलो अलिफ लैला री कहाणियां अेक मांय सूं दूजी निकळती गई अर इण भांत पूरी इकोतर सौ रातां ताई अँ कहाणियां चाली। बादस्या नै कहाणियां सुणण रो कोड हो। उण अँलान कस्यो कै बो कहाणी सुणणो चावै, पण बात जे रात नै बिचाळै खतम हुयगी तो मौत री सजा मिलैली। कहाणी कैवणियै अँडी कहाणी छेड़ी कै बात मांय सूं बात निकळती गई अर बात आगै

चालती गई। आखिर बादस्या नैं ई हार मानणी पड़ी। लोककथावां में कौतूहल तत्त्व इतरो जादा हुवै कै बो श्रोतावां नैं बांध लेवै। अँ विसेसतावां दुनियां री हरेक भासा री लोककथा में मिलैली। लोककथावां जे इतरी लंबी ही तो छोटी भी है। बांनै अेक ओळी री लोककथा कैयी जा सकै। बै कदे छोटी लोककथावां ही, पण आगै चालनै मिनख रै अनुभव में ढळती-ढळती कैवतां बणगी। जियां कै लेणो अेक न देणा दो, सूतां रै पाडा जामै, अंगूर खाटा है, टकै री हांडी फूटी अर गंडक री जात रो बेरो पङ्गो, सीख न दीजे बांदरा घर बया को जाय। कदे अँ सीख सूं भरियोड़ी लोककथावां ही। लोगां री यादां में बसगी अर जबान माथै इतरी चढगी कै कैवतां बणगी। लोक में अँड़ी सँकडूं नई बलकै हजारं लोककथावां है।

लोककथावां में लोकरंजन रै अलावा अेक उम्मीद सूं भरयोड़ो भविस है। राजकंवरां, राजावां या कथावां रा बै पात्र जिका बीखा झेल-झेलनै सफळता हासल करता बै श्रोतावां रै मन में उम्मीद री अेक किरण जगांवता कै बै भी जे मैणत करैला तो बांनै भी सफळता मिलैली। बां दिनां काच रै डब्बै साम्हीं बैठ कैमरै सूं बणायोड़ा आदरस कोनी हा। लोककथावां रा नायक चाथै कल्पना री दुनियां रा नायक हा, पण मिनख रै दुख-सुख रा साथी हा। कस्ट में घिरयोड़े मिनख नैं चकवो-चकवी कोई दिसा दिखांवता। मर्यां पछै बां रो संघर्स देखनै पारबती नैं दया आ जांवती अर बा स्यो महाराज साम्हीं हठ करनै बैठ जांवती कै बै उनैने दुबारा सरजीवण कर देवै। स्यो महाराज आपरी चिटली आंगळी काटनै आपरै खून रो छोटो देता तो मरेड़ो मिनख बियां ई उठ बैठतो जियां कोई नौद सूं जागै। कोई देवता बां माथै दया करनै कोई अँड़ी मणि दे देंवतो कै उनैने मूंडै में धरतां ई मिनख गायब हुय जावै। गायब हुयां पछै बै जुल्म करण वाळै नैं मजो चखांवता। कोई भूत, जिन्न या परी किणी सीधै मिनख माथै दया करनै झर-झर कंथा दे दिया करता जिकी नै झड़कावतां ई हेठां रिपियां रो ढेर लाग जाया करतो। आज आपां अँ बातां जाणां कै बो स्सो कीं काल्पनिक हो, पण इण सूं टूटेड़ा-हारेड़ा मिनखां नैं कितरो संबल मिल्या करतो। अँ कहाणियां बांनै अेक मनोवैज्ञानिक संबल दिया करती। आंरी छाप जद टाबर रै मन माथै पड़ती तो बां रै व्यक्तित्व रो हिस्सो बण जाया करती। इण सूं बां रै मन में संघर्स करणै री तागत बापरती। बां रै चरित्र निरमाण में सहायक हुया करती। आ बात खुद-ब-खुद सिद्ध है कै कुदरत में कोई भी फालतू चीज कोनी रैवै। जद तांई उणरो उपयोग है उण बगत तांई ई बै रैवैली पछै आपी आप नस्ट हुय जावैली। जद ई तो कवि कैयो है—‘प्रकृति के यौवन का श्रृंगार, करेंगे कभी न बासी फूल।’ आप देख्यो है कै रूख रै जद नूवा पत्ता निकळण लागै तो पुराणा झड़ जावै। इणीज भांत अँ लोककथावां है। जियां-जियां लोकमन रो बिगसाव हुंवतो जावै आं लोककथावां में बदळव आ जावै। जे नीं आवै तो अँ लारै छूट जावै अर आंनै जे कोई सहेजै नई तो स्मृतियां में भी मर जावै।

अेक जमानै में ख्याल-तमासां रै साथै-साथै अँ लोककथावां भी मनोरंजन रो अेक अंग ही। लोककथावां रो सै सूं सबळो पख बांरो भेळप करणै रो गुण है। बियां तो हरेक

कला मिनख नैं मिनख सूं जोड़ै अर उणमें मिनखपणै री तमीज पैदा करै, पण बीजी कलावां में कीं न कीं ताम-झाम री जरूरत हुवै बा बात कैवण में कोनी हुवै। अेक श्रोता रै आंवतां ई बात सरू करी जा सकै। बात कैवणियै री बात नैं जद साम्हीं सूं हुंकारो मिलै तो सुणावण वाळै में जोस बापरै अर उणमें रोचकता अर आणंद बध जावै। जियां फौज में नगारो बाजणै सूं जोधा में जोस उमड़ियावै बियां ई हुंकारो भरणै सूं बात कैवण वाळै में भी जोस भर जावै। जद ई तो कैवत चाली—फौज में नगारो अर बात में हुंकारो। हुंकारो भरणियो भी कोई श्रोता ई हुवै। बातपोस बात कैवती बर आपरै ज्ञान रो पिटारो खोल देवै। ज्ञान, विज्ञान, लोक, शास्त्र, इतिहास, काव्य आद री उणनैं जितरी बातां याद हुवै बो उण में उंडेल देवै अर बात रोचकता साथै आगै बधती जावै। रोचकता री कमी तो नाटक, गीत, संगीत, रम्मत, त्रित आद में भी कम कोनी हुवै, पण इण सगळ्यां में दरसकां या श्रोतावां री भूमिका मून रैयनै बैठ्या रैवण रै अलावा कीं कोनी हुवै जद कै बात में हुंकारो भरणाळै रो पूरो-पूरो इन्वाल्वमेंट हुवै। बात में किणी भांत रै साज-बाज या मंच आद री कीं जरूरत कोनी हुवै। बात में टाबरां, जवानां अर बूढां सगळ्यां रो अेक साथै मनोरंजन करणै री खिमता हुवै।

लोककथावां में जितरो आकरसण ग्रामीण अर अणपढ लोगां रो हो उणरै साथै-साथै सिक्षित अर उच्च वरग भी आं सूं कम प्रभावी कोनी हो। फिल्मी दुनियां रो इण लोककथावां कानी खूब आकरसण रैयो है। इण कारण लोककथावां नैं लेयनै घणी ई फिल्मां बणाईजी है। म्हें आ बात सिरफ आपणै देस सारू कोनी कैवूं बल्कै दुनियां रै हरेक देस आप-आप रै देस री मसहूर लोककथावां माथै फिल्मां बणा-बणायनै नाम अर दाम कमाया है। इण प्राचीन साहित्य रै अणमोल खजानै में अणगिण नगीना है।

आज आ घणी चिंता री बात है कै लोककथावां कांई सगळी लोककलावां रो होळै-होळै ह्रास हुयां जावै। लोक में जद आं रा कदरदान कोनी रैया तो लोक कलाकार भी भूख सूं बांथो करता-करता आपरो पेसो बदळणै सारू मजबूर हुयग्या। इण रो सै सूं घणो असर तो समाजिक भेळप माथै पड़्यो ई है, साथै ई टाबरां रै चरित्र अर व्यक्तितव निरमाण माथै भी पड़्यो है। पुराणै जमानै में जद दादी, नानी या कोई भी बुजरग जद टाबरां नैं कहाणी सुणांवतो तो पारिवारिक सामंजस्य अर समरसता रो वातावरण घर में बण्यो रैवतो। टाबर बुजरगां सूं सहजै ई बां रै अनुभवां सूं इतरो कीं सीख लेंवता कै उतरो किणी भी कॉलेज या स्कूल में सीखणै सारू कोनी मिलतो। आज रा नान्हा टाबर टीवी साम्हीं बैठनै कांई देखै अर कांई सीखै औ किणी सूं छानो कोनी। म्हें आ तो कोनी कैवूं कै आपां बीतेडै बगत नैं पाछो ल्याय सकां, पण आवणाळी पीढी सारू आपां नै कीं न कीं तो करणो ई पडैलो कै बै देस अर समाज रा भला नागरिक बण सकै। बांनै राह बताणै रो फरज तो आपणी पीढी रो ईज है।





डॉ. आईदानसिंह भाटी

परमाणु रै पळकां बिच्चै

आ धरती, आ धूसर माटी
रंग अलेखूं
परबत घाटी ।
धवळ-वेस मरजादा आळी,
जिण भुगती ही रातां काळी ।
उण माटी में,
उण आंगण में,
बुद्धां री करुणा लैराई,
महावीर अहिंसा अरथाई,
मोरपांख गीताजी गाई ।
उण माटी में
उण धरती में
व्याप गई ही अलख उदासी
बीखरगी ही पांख प्रेम री
अंधकार हो सत्यानासी
मरजादा पग व्हिया पांगळा
मिनखपणै नै सुरसा गिटगी
डाकीचाळो देस व्यापग्यो
अन्धकार अंतस ऊतरग्यो
गांव गरीबी, नागी नगरी
आदम रो जायो बण चकरी
आंख्यां साम्हीं
ओढ गुलामी
अन्नदाता री जै जैकारां
करतां-करतां जुग पळटाय।

जीवण री आपाधापी में
कूड आखरां री कापी में
एक सबद आंख्यां खोली
मिनखजून रो अरथ बतायो
हींयै बिचाळै में साच जगायो ।
वै आंख्यां अपणापै आळी
पत्तां-पत्तां, डाळी-डाळी
गांव-गौरवां / ओरण डांडी
रिनरोही, मगरा अर घाटी
नगर-नगर / अर सैहर-सैहर में ।
बांध लंगोटी / हाथां लाठी
आभै अर धरती नै नापी
ओढ देह पै अेक कापडो
बांध आप री कमर काठी
साबरमती में सुर लैराया
सोरठ री आंख्यां अरथाया
मधरी-मधरी बोली-बोली
डब-डब पाणी, करुण आंख्यां
आजादी रो अरथ बतायो ।
दसां दिसावां गूजण लागी—
औ कुण आयो ?
औ कुण आयो ?
मुळक-मुळक मनभाणी आंख्यां
अपणापै री ऊजळ पांख्यां
अंधकार नै उण जग वौकार्यो ।

ठिकाणो :

8 बी/47

तिरुपति नगर, नांदड़ी

जोधपुर 342015

मो. 7597950129

उण गांधी सूं
 उण आंधी सूं
 सात समंदर रा सिंघासण
 हळबळ-हळबळ करता आसण
 धूजण लागा ।
 गोरं आळी उण सत्ता नै
 संत नाप ली एक कदम सूं
 सत्य अहिंसा सूं ललकारिया
 उण वौकर्यो अंधकार नै ।
 बम्बां री बळती लपटां में,
 गोळ्यां री जबरी झपटां में,
 दानवता री उण आंधी में,
 वै दो आंख्यां—
 सूरज री साखां निपजादी
 लडखडती लुळती काया में,
 भारत भू रै हर जाया में,
 भरदी 'वासंती आजादी' ।
 उण बोलां सूं
 उण बाणी सूं
 गंगजमन री छौळां उछळी
 ब्रह्मपुत्र रो वेग बदळ्यो
 चम्बल रै पांणी बळखायो ।
 सिंधु री लैरां अरथायो—
 औ कुण आयो ?
 औ कुण आयो ?
 आंधी अर बोळी जगती में
 औ किण रो परचम लैरायो ?
 पंचनद री धारा अरथायो—
 औ कुण आयो ?
 औ कुण आयो ?
 कृष्णा कावेरी जस गायो ।
 औ कुण आयो ?

औ कुण आयो ?
 छिप्रा रेवा तट बरडायो—
 औ कुण आयो ?
 औ कुण आयो ?
 सात समंदर धज सूं बोल्या—
 औ म्हारो उद्धारक आयो
 काळी मानवता कुरळई—
 औ म्हारो रुखवाळो आयो
 भूखी आंतडियां अरथायो—
 औ म्हारो अपणापो आयो
 सदी बीसवीं वध नै बोली—
 गांधी-आयो / गांधी आयो ।
 आज उणी री पकड्यां डांडी
 बांध-बांध नै कमर काठी
 झाल हाथ में उण री लाठी
 उण 'वामन' री आ मानवता
 भूखी-नागी नाठी आवै—
 अंधकार री आंख्यां में खीरा उछळती ।
 सिंघासण री दाढां बिच्चै हाथ घालती ।
 उण गांधी नै / उण वामन नै
 आवण आळी अजरी पीढ्यां
 आवण आळै अजरै जुग में
 परमाणु रै पळकां बिच्चै
 अंधकार
 अर
 इन्यावां बिच्च
 अरथावैला
 अपणावैला
 गुण गावैला ।
 ♦♦

कविता



ओम नागर

दो प्रेम कवितावां

रंग अर तूं

जद बी देखतो
गरियाळां में होळी का रंग
देहळ पै ऊभी निजर आ जाती तूं।
कै जस्यां ई खडूंगो साम्है सूं
ऊलाळ देगी मुट्टी भर गुलाल
अर म्हूं
गाबां पै हैरतो रह जाऊंगो थारा रंग।
म्हारी असमानी कमीज देख'र
गुलाबी हो जावै छौ थारौ उणियारो
सगोस में नैणां की कोर सूं रळक जावै छो काजळ
थारा रंग-ढंग देख'र छानै-छानै
चुगल्यां करबा लाग जावै छा बिछिया
ओळ्यूं छै थईं वां होळी ?
जद चमटी भर गुलाल सूं भर दी छी थारी मांग।
फेर अकसमचो

ठिकाणो : आंगणां में ऊभी भायल्यां नै
साहित्य अकादेमी पटक दिया छा घणकरा रंग
क्षेत्रीय कार्यालय धूलण्डी का धूमधड़ाका में बी
172, मुंबई-मराठी ग्रंथ संग्रहालय मार्ग, दादर (पूर्व) भीत पै गडी रह'गी छी थारी आंख्यां।
मुंबई 400014 भायल्यां कांई गी आरसी साम्हें
मो. 9460677638 बावळी की नाई हैरती रही

थारी मांग में म्हारै हाथां भरकी
 चमटी भर गुलाल ।
 आज बी
 होळी का रंगा में घुळी छै थारी ओळ्यूं
 बसंत का फूलां में घुळी छै थारी सौरम ।
 जीं रंग में ढळ जावै छै तूं
 ऊं रंग में दमक जावै छै
 म्हारी जिनगाणी को उणियारो
 थारी प्रीत को उणियारो ।

प्रेम करबा हांळा की बातां

न्हं बीतती बतायी
 प्रेम करबा हांळा की बातां
 पहरा ताई असी काई बातां करै छै
 प्रेम करबा हाळा ।
 प्रेम करबा हाळां की मनमान सारी बातां में
 कतनी 'क बातां होवै छै
 काम की बिना काम की ।
 कतनी 'क लांबी होवै छै
 प्रेम करबा हाळां की सींग-पूँछ
 होवै बी कै न्हं होवै ये तो वोई जाणै
 सांच अर झूठ को कतनो सतभखेलो
 बगत की चारणी में चांळता रैवै छै
 मुडी दो मुडी बाळू ।
 प्रेम करबा हांळा की बातां
 चकवा-चकवी की भासा में
 यां फेर कागलां की कांव-कांव छै बस
 उस्यां तो आखा मलख की भासावां में
 स्यारकी ई होवै छै प्रेम की बोली
 पण अक दिन बातां ई बातां में घड़ लेवै छै
 आपणी नुयी तथाक भासा ।
 प्रेम करबा हाळां की बातां को बहीखातो

घणो लूँठो
 मांडता चल्या जावै छै
 माथा सूं माथो जोड़यां जागा की पोथी ।
 काई कोई जागो स्वामण अनाज कै साँटे
 बांचतो रेवैगो यांकी जून-जातरा
 फेर बी तो रह ई जावैगी
 बातां थोड़ी-घणी बातां
 मांडता-मांडता
 बांचता-बांचता
 प्रेम करबा हाळां बातां ई बातां में
 धोळा-दुपहरा तोड़ लावै छै तारां
 आथणी आडी सूं उगा दे छै सूरज
 हज्यारां का फूलां में धर दे छै मोगरो
 हमेस आपणी नरम हथेळ्यां सूं
 समेटता रेवै छै
 गरियाळा में बिखरी आपणी निरमळ हांसी ।
 प्रेम करबा हाळा
 मूंडा सूं कम आंख्यां सूं करै छै बदती बातां
 सैण ई सैण में भड़ा ले छै
 मिलण की जुगत
 पण कदी-कदी डरफ सूं बी
 भर जावै छै काळज्या ।
 प्रेम करबा हाळा
 काई साच्याई जीत लै छै जुद्ध
 या फेर अठी बी
 बगतसर आ 'ण ऊभा होवै छै
 केई सिखंडी
 पण ये कुण कन्हाई कै भरौसै
 करता रैवै छै प्रेम
 या तो प्रेम करबा हाळा ई जाणै छै ।

◆◆



सुनील गज्जाणी

टिब्बा म्हारो माण

रेतीला टिब्बा
म्हारी छिब
म्हारै हियै मांय
रच्या-बस्या !
टिब्बा, सैनाणी
टिब्बा म्हारो माण
टिब्बा जकै सारू म्हनै गीरबो है !
टिब्बा फगत बेळू रा धोरा नीं है
धोरा कवळा-कवळा
किणी हेत भांत !
धोरा, म्हारो माण
धोरा परोटै है
मानखै नै
अर मानखो
पग-पग लगोलग बाड़ै है
उणनै आपरै सुवारथ मांय !
टिब्बा मन भावता
सागीड़ा डीगा-डीगा
मार न्हाख्या धोरा
निरा ई म्हारै गांव रा
बा जमात
जिकै रै हियै मांय हेत नीं हो
बै मिनख जिकै नै हेत नीं है
आप री संस्कृति सूं



ठिकाणो :
सुथारां री बडी गवाड़
बीकानेर 334005
मो. 9950215557

अँ धोरा
अँ टिब्बा
फगत बेळू नीं है
म्हारो छुटपणो है
जिकै मांय
म्हें रम-रम'र बध्यो हो !

इण टिब्बां री
आवण आळी कैड फगत
सैनाणी सोधैला
पोथ्यां मांय ओळ्या बांचता
आ संस्कृति जद बचसी
जद हिंयै मांय हेत जागसी

जियां थरपा हां
किणी रोडै माथै आपां
माळीपानो चेप'र उणनै
देवी-देवता धोकण सारू
उण भांत इण पेडै ई कोई
आस्था होवणी चाईजै
कै बै सोनलिया धोरा
सूपणो है जियां रो तियां
अेक केड सूं दूजै केड
जियां सूपां हां आपां
आपणै घर रो जूनो पट्टो !

म्हारा सुपना

म्हारा सुपना
म्हासूं दुभांत करै है
नींद मांय दीसै सै किसा ई
अर साच होवै किसा ई !

सुपना साच लारै भागै
अर साच जिंदगाणी रै
जंजाळ मांय फस्योडो
रुध्योडो !

हिंयै रो हेत

बा आपरी आंख्यां सूं
सो-कीं कैय दियो
टप-टप टपकै हा टोपा
उण आंख्यां सूं
बा फगत मून हुयोडो बैठी ही
मूंडै सूं कोई बाफ नीं काढी
हिंयै रो हेत
आंख्यां सगळी चवडी कर दीनी !

हेत

हेत
कदैई उगत्यै सूं नीं होवै
हेत
काळजै मांय निपजै जणै ई होवै !

जिंदगाणी

जिंदगाणी
चोकै-बासै जित्ती ई
नीं होवै
पण इणसूं
निरवाळी भी नीं होवै !





सीमा राठौड़ 'शैलजा'

हिवड़ो है अधीर

गोरड़ी करै सोळा सिणगार, हिवड़ो झोला खावै चार

झीणो-झीणो घूँघटियो, गजबण नैणां तीर
नैण कटारी लागी काळजै, गयी हिरदो चीर
है माथै थारै राखड़ी, अर बैया बाजूबंद
हिवड़ो मारै हिलोरां, बायरो चालै मंद-मंद
पगल्यां पाजेब बाजणी, मेंदी राच्या हाथ
जिवड़ो बसै थारै चूड़लै, रमस्यां थारै साथ
गोरड़ी करै सोळा सिणगार, हिवड़ो झोला खावै चार

नैणां काजळ री रेख है, होठ थारा लाल
पीळो-पीळो घाघरो, ओढ कसूमल चीर
म्हारै मनडै थे बस्या, मोवणो चूड़लौ चीर
धोरां सो तपतो हियो, जोवां थारी बाट
बेगा पधारो मिरगानैणी, बरसावो हेत री छंट
म्हारै जीव री जड़ी, थे मत ना बढ़ावो पीड़
बुला ल्यावो सखी, म्हारो हिवड़ो हुयो अधीर।

ठिकाणो :

वार्ड नंबर-16,
कानोड़िया अस्पताल कनै
मु. पो. मुकुंदगढ़
जिला -झुंझुनूं
राजस्थान 333705
मो. 7906044832

म्हारी क्यारी-सखी प्यारी

हरियल तोता सी है क्यारी,
प्यारी सखी घणी म्हारी,
हरी-भरी हरियाळी,

म्हारी सखी भोळी -भाळी,
 मनमोवणी सगळी क्यारी
 लागै जिवडै सू प्यारी,
 मनडै री सगळी बातां करल्यूं,
 थानै सखियां नै बाथां भरल्यूं,
 मनडै री पीडु सुणै सगळी
 हंस-हंस घणी बतळावै
 कदै साथै आंसूडा दुळकावै,
 तो कदै मुळकै कदै सरमावै ।

तन-मन री हुवै बातडुल्यां,
 बोझो-बोझो, पत्यां-पत्यां,
 हेत सू नाचण लागै,
 म्हारी आंख्या में भी
 नूवी चमक आ जावै,
 मनडो खिल-खिल जावै ।

बतळावां इण सखियां सू जद,
 भूल जावां जगत री हर पीडु,
 सखियां म्हारी हरियल तोता सी,
 देख सखी प्यारी नै,
 मनमोवणी क्यारी नै,
 म्हे भी आनंद सू
 हरी- हरी हो जाऊं ।

कविता री चाह

चाह नीं है म्हें छप ज्याऊं,
 रद्दी में फेर लुक ज्याऊं,
 चाह नीं है मोटी पोथी रा,
 पानडां तळै दब ज्याऊं,

चाह नीं है मंचां रै माथै,
 जोर-जोर सै गायी ज्याऊं,
 सोभा बणू जळसै री,
 घणी भाग्य पै इठलाऊं ।

मांडो म्हानै हिवडै री कलम सू,
 भावां री स्याही दुळकावो
 सरल-सहज ही मांडो म्हानै,
 बिण छंदां रै लाग लपेटै
 छप ज्याऊं जणमाणस में
 काळजयी कविता बण ज्याऊं
 देसप्रेम री लहर जगाऊं
 क्रांति री ज्योत जळाऊं
 मां भारती रो तिरंगो बण लहराऊं ।

मोरपांख में रमी राधा

मोर मुगट माथै धर्यो,
 प्रीत में राधे थारै नाथ
 मोर पांख सू तन ढांप लियो,
 सोवै तकियो बणा हाथ ।

बिछा दिया पांखडा जाणूं,
 मोर सगळी धरा पर आज
 पुराणी प्रीत में झूम रही,
 जाणूं लाडली राज ।

रूप थारो घणो मोवणो,
 लागै राधे सरकार
 करूं निछरावळ इण पर,
 म्हें सगळो संसार ।





डॉ. शारदा कृष्ण

तूं थारै घर जाव करोना

तूं थारै घर जाव करोना,
म्हे जावां स्कूल

नीं खेल्या नीं कूदया भाया
घर ई घर में हुया पराया
बारै पग-पग पसरुयो खतरो
नानी-दारदी हटक सवाया
पीटी डम्बल लेजन भूल्या
गया प्रार्थना भूल
करोना म्हे जावां स्कूल

ऑनलाईन क्लासां री कळझळ
सर मैडम जी बोलै अड-बड
नेट प्रॉब्लमां नाडी टूटै
लिंग जुडै नीं, टूटै पळ-पळ
टेब फोन कम्प्यूटर माथै
होमवर्क अधझूल
करोना म्हे जावां स्कूल

ठिकाणो :

आशादीप, पिपराली
रोड, सीकर (राज.)
9928743194

तूं थारै घर जाव करोना
म्हे जावां स्कूल।

बीरा लेवण बेगो आई

इण आंगणियै जलमी जाई
सुण बीरा म्हें नहीं पराई


काका-बाबा री बाखळ में
झोळी भर-भर लिछमी ल्याई

मोत्यां बिचली लाल लाडली
घण लाडकडी हूं म्हें बाई

तीज-तिंवारां रंग भरूं म्हें
आंगणियै री ओप सवाई

तिलक लगाऊं करूं आरतो
बांधूं राखी नेग चुकाई

चढ डागळियै बाट उडीकूं
बीरा लेवण बेगो आई ।



आव बेलिया पेच लड़ावां

आव बेलिया पेच लड़ावां
बै मास्या बै काट्या गावां

ऊंची मैड़ी चढां अटारी
चरखी डोर पतंग उधारी
बाळ परो परदेसी मांझो
हाथ सुंताई रील सुधारी
पंछी पंथी खैर मनावां
आव बेलिया पेच लड़ावां

उडती पतंग अकासां जासी
कटतां पाण धरा आ जासी
हवा आपरै बस कर लेसी
डोरो छूट तिंवाळा खासी
भरां उडारी गोत लगावां
आव बेलियां पेच लड़ावां

काणे-काण राखजै मतना
ढील अणूती दीजै मतना
डोर हाथ में साध राखजै
घणी गुचळकी भरजै मतना
सर-सर सरणाट मचावां
आव बेलिया पतंग उड़ावां ।



दीनदयाल शर्मा

दस हाइकू

अक

बेटी आयगी
थूं क्यूं हुवै बेचैन
रब री देन ।

दोय

पांचूं लाडला
सै रैवै दूर-दूर
ओळ्युं है साथै ।

तीन

बडेरो रूख
अजे ई करै आस
आयसी पाखी ।

चार

रगती रिस्ता
मदद मिली कोनी
हालत खस्ता ।

पांच

आ कैड़ी प्रीत
सोग मांय मिठायं
निभावै रीत ।

छह

छोटी है सोड़
मिणत करै कोनी
पगां नैं मोड़ ।

सात

रो ना अकेलो
मिल रै सै करल्यां
मन हळको ।

आठ

खून सूं लिख
मनडै री सै बात
मिलै सौगात ।

नौ

ना कर रीस
नुकसाण हो सकै
दांतां नैं पीस ।

दस

जग रो सार
दुखी आखो संसार
कर बिच्यार ।

ठिकाणो :

10/22 हाजसिंग बोर्ड
हनुमानगढ़ जं. 335512
मो. 9414514666



प्रहलाद कुमावत 'चंचल'

सुरंगो राजस्थान

सगती भगती रो मेळ जठै, हिवडै में साचो सगपण है।
इण राजस्थान रंगीलै रो, थे सुणो सांतरो वरणण है।।

बंका केसरियो मांडणियां, जौहर री ज्वाला पदमण है।
राणा, दुर्गा सा जोध जबर, भालै-खांडै री खणखण है।
हाडी राणी री अमर कथा, पन्ना रो अठै समरपण है।
मुंड कट्योड़ा रुंड लडै, गाथावां गूजै कण-कण है।
इण राजस्थान रंगीलै रो, थे सुणो सांतरो वरणण है।।

पाबू, हड़बू जी, रामदेव, गोगा, मेहा रा दरसण है।
सतवादी सूरा तेजा री, देवळियां पूजै जण-जण है।
कोळायत गळता बेणेसर, पुष्कर रो न्हावण तरपण है।
करमां-मीरां, जम्भेसर जी, दादू री वाणी मुगतण है।
इण राजस्थान रंगीलै रो, थे सुणो सांतरो वरणण है।।

ठिकाणो :
बस-अड्डै रै कनै
पोस्ट ऑफिस रै साम्हीं
ग्रा. पो. जाहोता
जयपुर-303701
मो.9887873315

ओसियां किराडू रणकपोर, में मकराणै री चमकण है।
आमेरां राज-विलासां में, आ शीशमहल री दमकण है।
या चांद-बावडी राज म्हैल, सै शिल्पकला रो दरपण है।
जिणनै निरख्यां सुख पाय नैण, म्हारै पुरखां रो सिरजण है।
इण राजस्थान रंगीलै रो, थे सुणो सांतरो वरणण है।।


सैंणी-बीजा, मूमळ-मेंदर, ढोला री प्यारी मरवण है।
 मिसरी घोळेडी मिठबोली, रागणियां गावै जण-जण है।
 सिरमोड़ बोरलो तिमणियो, झणकै पायल री झणझण है।
 सुबरण रा सोहवै बाजूबंद, पाणी नैं जाती गजबण है।
 इण राजस्थान रंगीलै रो, थे सुणो सांतरो चितरण है। 4।

असर अस्यो अंग्रेजां आळो

असर अस्यो अंग्रेजां आळो, आपां 'के' सू 'के' होग्या।
 जाणै कद चुपचाप खिलूणां, चाबी हाळा 'म्हे' होग्या ॥

मायत पूजण रीत अठे तो, जुगां जुगांतर ही भाई।
 ऊठ सुंआरै दरसण करणां, पगां लागणा नितका ई।
 धरती पै भगवान जका है, बै मायत अब 'डे' होग्या।
 असर अस्यो अंग्रेजां आळो, आपां 'के' सू 'के' होग्या ॥

दिन भर थाक्या, रात्यूं जाग्या, सै मनसा पूरी थारी।
 ज्यो थानै दस-दस नैं पाळ्या, दोय जीव होग्या भारी।
 'ओल्ड एज हाउस' में घाल्या, एडवांस ही 'पे' होग्या।
 असर अस्यो अंग्रेजां आळो, आपां 'के' सू 'के' होग्या ॥



नर-नारी को पतो न चालै, तन का कपड़ा लत्ता सूं।
 मुछमुंडा तो भला कह्या पण, कठै मानिया अत्ता सूं।
 विधना नैं झूठी कर दीन्ही, छोरा छोरी 'गे' होग्या।
 असर अस्यो अंग्रेजां आळो, आपां 'के' सू 'के' होग्या ॥

'चंचल' व्ह्या नकल में मौ'दा, सैंसकार सै भूल गिया।
 मिनखपणै रा डोळ पुरबळा, दिन-दिन दूणा डूब रिया।
 कह्नी सुणयोड़ी अेक न लागै, नकटा-बूचा सै होग्या।
 असर अस्यो अंग्रेजां आळो, आपां 'के' सू 'के' होग्या ॥





डॉ. रेणुका व्यास 'नीलम'

केसर री क्यारी मांय बादळां सूं बतळावण

(लारलै अंक सूं आगै)

पहाड़ां रा मिनख लंबा-गोरा अर मजबूत हट्टी रा हुवै। फर-फर करता पहाड़ां पर चढ जावै अर खट-खट करता घाट्यां उतर जावै। तीखी नाक अर कंजी आंख्यां। ढीलो-गरम कुरतो (फिरन) पैहरै। बीं रै मांयनै कांगडी (खास तरै री बोरसी) राखै, जकी बांनै माइनस तापमान में भी गरमी देवण रै काम आवै। अठै कश्मीरी भासा बोलीजै। बै हिंदी नै समझै अर जरूत होवण पर बोलै भी है।

कश्मीर री लुगायां रो तो कांई कैवणो! बै तो जाणै रूप रो सैलाब ई हुवै। कोई लांबी, छरैरी तो कोई माखण रै गोळै जिसी गोळमोळ अर गुदगुदी। सगळी गोरीगट्ट। सेब बरगा गुलाबी गाल, पतळा-पतळा फूलां री पाखंडी जिसा होठ अर सुंदर नैण। जम्फर-सलवार पैहरै अर अरब देसां री लुगायां जियां माथे पर दुपट्टो बांधै, जको बांनै घणो ई सोहवै। केई बुरको भी ओढै। बांरो घणो-सो सरीर ढक्योडो रैवै।

म्हारी मुलाकात केई महिला शिक्षकां सूं हुयी। बंतळ मांय म्हनै बै सगळी समझदार, सजग अर सोझीवान लागी। मन नै ठावस होयो कै चालो कस्मीर रा टाबरिया समझदार हाथां मांय है।

कश्मीर रै लोग-लुगायां नै म्हे आंख्यां फाड़-फाड़'र देख्या। उणरी आंख्यां अर बोली सूं म्हे उणां रै मन नै जोवण री कोसिस करी, पण हरेक मिनख म्हानै दूजै मिनखां जियां रोजी-रोटी री चिंत्या, घर-परिवार री भलाई अर सांति री चावना सूं भर्योडो लाध्यो। याद आई म्हानै मिनखाचारै रै हामी लोगां री बातां कै आम इंसान तो आपरी जूण पूरी करण में ई अळूझ्योडो रैवै। आप रै स्वारथ में आंधा लोग बांनै गुमराह करै अर असांति फैलावै। असांति री आड़ मांय इण तरै रा स्वार्थी लोग आपरो उल्लू सीधो

ठिकाणो :
'श्रीकृष्णम्'
सीताराम द्वार रै मांय
बीकानेर (राज.)
मो. 9414035688

करै अर मार पड़ै गरीब, अणपढ अर निबळं मिनखां पर। आखी जातरा मांय म्हें मैसूम कस्तो कै पहाड़ां माथै जीवण भोत दोरो हुवै। पूरी तरियां परकत रै अधीन! परकत राजी तो मिनख सोरो अर परकत नाराज तो मिनख परेसान! आखी घाटी में सियाळै रा चार-पांच मास घणा ई दोरा हुवै। बरफबारी सूं मारग बंद हुय जावै। स्कूल-कॉलेज, काम-धंधा सै बंद हुय जावै। आम आदमी नै तो रोटी-पाणी रो ई तोड़ो हुय जावै। इण कारण ई गरीबी अर बेरुजगारी अठै री सैं सूं बडी समस्या है। स्वारथी लोग इण गरीबी, बेरुजगारी अर ठालेपण रो फायदो उठावै अर जवानां नै गुमराह करै। म्हें लागै कै देस अर घाटी रै विकास वास्तै गरीबी अर बेरोजगारी री इण समस्या रो कोई पक्को इलाज होवणो भोत जरूरी है।

आगली भोरमभोर म्हे 'गुलमर्ग' चाल्या। गुलमर्ग बारामूला जिले में पड़ै। गुलमर्ग म्हें 'पुसबां रो मैदान' कस्मीर में मैदान नै 'मर्ग' कैयीजै। सीधी सपाट सड़क रै आसै-पासै छोटा-छोटा गांव अर हरियल झाड़ां री लांबी कतारां चोखी लागै ही। पहाड़ी ढालां माथै चीड़ अर देवदार रा रूख मारग री सोभा बधावै हा।

कठैई तो लीलै आभै मांय नान्हा-नान्हा धोळा बादळिया रूई रै चूंखां जियां बिखस्योड़ा हा, तो कठैई बादळिया अेक-दूजै रो हाथ झाल्यां सर-सर बैवै हा। कठैई अेक-दूजै रै कांधै चढ्योडा धींगामस्ती करै हा।

समंदर तळ सूं 2730 मीटर ऊंचै इण हिलस्टेशन में घुसण सूं पैला म्हानै ड्राईवर रै कैयां मुजब भाड़ै माथै मोटा-गरम कपड़ा अर रबड़ रा जूता लेवणा पड़्या। रबड़ रा जूता टंड सूं तो बचाव करै ई है, कादैं में फिसळण सूं भी बचावै।

पहाड़ां रै मौसम रो मिजाज तो मिनख रै मिजाज सूं ई बेगो पलटो खावै। मौसम अेकेदम बदळ्यो। छोटी-छोटी बुंदक्या गाडी रै बोनट, बाग- बगीचा अर सड़कां माथै नाचण लागगी। ठारी बधगी।

गुलमर्ग में गाडी स्टैंड पर ई छोडणी पड़ै अर पाळा-पाळा बैवणो पड़ै। म्हे पाळा-पाळा बैवै हा। टंड रै कारणै तन मांय कंपा बधती जावै ही। बिरखा चालू ही। गुलमर्ग रो बडो जूर थाळी जिसो हरी-मखमली घास रो मैदान बिसेस देखण जोग ठौड़ हो। खासो बडो मैदान कठैई साव सपाट अर कठैई ऊंचो-नीचो हो। बीच-बीच मांय साफ झक पाणी रा ताळ, बां पर छोटा छोटा काठ रा पुल अर नान्हीं-नान्हीं झूपड़्यां परीलोक-सो दरसाव पैदा करै ही। कैवै कै अठै पिक्चरां री सूटिंग भी होया करै। म्हे अठै 'जै-जै शिवशंकर' फिल्मी गीत आळै शिव-मिंदर रा दरसण ई करिया। कैवै कै सियाळै मांय गुलमर्ग स्कीइंग अर गोल्फ रो मानीजती ठौड़ हुय जावै। दिसंबर में बरफ पड़्यां पछै, स्कीइंग अर गोल्फ रा प्रेमी दुनिया भर सूं अठै आय दूकै। दुनिया रो सै सूं बडो गोल्फ कोर्स अठै ई है।

गुलमर्ग सूं 'गंडोला केबल कार' मांय बैठ'र और ऊंचै पहाड़ां पर भी जाईजै। म्हे भी ऊपर जावण वास्तै टिगट लेवण खातर लैण मांय लागग्या। मुल्कां बरगी भीड़ ही। ठारी इत्ती कै गरम कपड़ा मांय भी दांत कटकटावै हा। टाबरां रा होठ लीला पड़्या। चाय पाय-पाय'र बांनै गरम राख्या। धंवर इत्ती तगड़ी कै साम्हीं ऊभो आदमी अर दरसाव नीं सूझै।

जून रो महीनो आ कड़कड़ी ठारी! सोच 'र ई मूंडे पर मुळक आयगी। म्हें सोच्यो—
 इण टेम म्हारै मरुदेस मांय तो बळती लूआं बाजती होवैली। बाळू रेत रा धोरा तवै जियां
 तपता होवैला। मिनख-जिनावर आपरो जीव लैयनै छिंया अर बादळां री आस में आभै नें
 ताकता होवैला। पण अठै तो माइन्स रो तापमान! पाणी भर्योडा बादळिया म्हांनै भिगोवता
 म्हारै ऊपर कर आवै-जावै हा। तीन-चार घंटा बाद भी जद टिगट खिड़क नीं खुली तो
 समाचार आयो कै ऊपर बरफ रो तूफान आयोडो है, जकै सूं आज के बल कार कोनी
 चालै। म्हे भारी मन सूं खावणो-पीवणो कर 'र, चीज बस्त मोलावता अर अठीनै-बठीनै
 घूमघाम 'र पाछा बावड्या।

कपडै री दुकानां माथै गरम पस्मीनै रा दुसाला, कांबळां, सूट, फिरन अर कोट बिकै हा।
 इसा गरम कपडा मैदानी इलाकै मांय दोराई सूं अर मूंधा मिलै। सेना रा जवान जनता री हर
 परेसानी रो समाधान करण नै लाग्योडा हा। म्हे बांसूं मुलाकात करी अर बांनै धन्यवाद दियो।

गुलमर्ग सूं घुड़सवारी कर 'र ऊपर थाजिवास ग्लेशियर अर जोजीला दरें भी
 जाईजै। पाछा बावड्या री वेळा मांय थोड़ी ताळ नै बादळ छंट्या अर आभो साफ हुयो तो
 अचाणचक साम्हीं बरफ सूं ढक्योडो धोळो धप्प जबरो ऊंचो पहाड़ निजर आयो। आपंद
 अर इचरज सूं काळजो धक्क रैयग्यो। डील मांय झुरझुरी दौडगी। आंख्यां अर गळो
 गळगळो हुयग्यो—हे रामजी! इतो सोवणो रूप! म्हारी तो जियां जातरा ई सुफळ हुयगी!
 धिन माँ परकत! धिन थारी माया! इयां लागै हो जाणै कोई साधु धोळ्या धार्योडो, आपरी
 पूरी गरिमा सागै जोग रमायोडो बिराजै है। सांत, मून, तिरपत अर आप में मस्त!

पाछा बावड्या जणां हाट-बजार खुल्योडो हो। ठौड़- ठौड़ माथै स्ट्रॉबेरी, चेरी रा
 डब्बा लियां दुकानदार सडक रै पसवाडै ई बैठ्या हा। दुकानां माथै सूखा मेवा—बिदाम अर
 अखरोट सज्योडा हा। म्हे रास्तै मांय सेब अर बिदामां रा बडा-बडा बाग ई देख्या।

आगलै दिन म्हानै 'पहलगाम' जावणो हो। पहलगाम मानै 'गडरियां रो गांव'।
 सागरतळ सूं 2130 मीटर ऊंचै पहलगाम रै रास्तै मांय क्रिकेट रै बल्लां रा बोळ
 कारखाना दीख्या जठै ढेर रा ढेर बैट सज्योडा हा। पोम्पोर में केसर रा खेत हा। सगळा खेत
 धोळ अर जामनी केसर रै पुसबां सूं लदफद हा। ठौड़-ठौड़ माथै सेना रा जवान तैनात हा।
 जकै रास्ते माथै म्हे चालै हा, बो रास्तो अमरनाथ जातरुआं रो मारग हो।

पहलगाम मांय म्हे अेक सरदारजी री होटल मांय ठैहर्या। इण इलाकै में घणकरा
 हिम्मत रा हेडाऊ सिक्ख आपरै घर-परवार, जमीन अर जायदाद सागै पूरे हौसलै सूं बसै।
 आप ई रैवै अर दूजां निबळां रो ध्यान ई राखै।

होटल सूं दूजी गाडी मांय म्हे चंदनबाड़ी पूग्या। घाटी में पाळा चाल्या। बिरखा बरसै
 ही। म्हे छतरी लैयनै रबड़ रा जूता अर मोटा कोट पैर्योडा टगमग-टगमग चालै हा।

दूर सूं ई पहाड़ां रै ढाळां माथै बरफ जम्योडी दीखै ही। असल में बै पहाड़ी ढाळ
 कोनी हा। बै तो जम्योडा ग्लेशियर हा। अेकै खानी ग्लेशियर रै नीचै सूं अेक तीखी अर
 मोटी पाणी री धार खळखळ करती बैवै ही। बीं नै लोग शेषनाग री धारा बतावै हा। धार

रो पाणी इसो टंडो हो कै हाथ घालां तो हाथ ई सूनो हुय जावै। धार री गति अर खळखळ मन मांय भय उपजावै ही। ग्लेशियर रै दूजै खानी पगांधिया हा, जका अमरनाथ जातरुवां रै काम आवै। कठैई-कठैई मारग में लारलै साल रै जातरुवां वास्तै बणायोड़ा अर अबै उजाड़ पड़योड़ा भेळा जाझरू अर न्हावणघर दीसै हा। कांई ठाह कित्तै ई घंटा म्हे बरफ रै गोळां सूं खेलता रैया। बरफ पर दौड़ लगावता अर फिसळता रैया। टाबरिया राजी हा अर म्हे मस्त! पाछा बावड़्या जणै रास्ते मांय घणा ई पिकनिक स्पॉट अर रिजोर्ट दिख्या। होटल आवतै-आवतै गरम कपड़ा रै बाद भी म्हें टंड सूं खड़खडीजगी। धूजणी छूटगी। ताव चढगयो। चाय सागै पैरासिटामोल ली अर ओढ'र सूती, जणै घंटा दो घंटा बाद सूई होयी।

दिनूगै म्हानै जम्मू वास्तै टुरणो हो। आगलै दिन री बीकानेर वास्तै म्हारी टिगट ही। ब्हीर हुवण रै बखत आसमान साव साफ हो। खुल्लै आभै मांय दूर बरफ रो मुगट धारयां हिमाळै री चोटी चमकै ही। जाणै म्हानै बिदाई देवण नै परगटी हुवै। म्हे सगळा मंतरायीज्योड़ा ज्यूं ऊभग्या। आंख्यां जाणै पलकां ई झपकावणो भूलगी। किणी रै मूंडै सूं अेक बोल ई नीं फूट्यो। म्हे सगळा चुपचाप आंख्यां रै रास्तै हिमराज नैं हिवडै मांय उतारै हा। म्हें हाथ जोड़'र हिवडै री सगळी लुळताई सागै हिमराज नैं निवण कर्यो अर कैयो, “हे हिमराज! थे जुगां-जुगां तांई म्हारै भारतभोम रा पोरैदार बण्योड़ा इयां ई गरब सूं ऊभा रैवो अर म्हारी धरती नैं जळ अर जीवण सूं हरी-भरी राखो। म्हे काची माटी रा मिनख थारो करज नीं उतार सकां। थारै कारणै ई म्हे हां। थारो परताप सवायो हुवै।”

पहलगाम सूं उतराई में लिदर नदी सड़क रै सायरै कर इयां बैवै ही जाणै कोई भायली बातां करती सागै-सागै चालती होवै। दूर तांई लिदर आपरी कहाणी कैवती रैया अर म्हे मून होय'र सुणता रैया। रास्तै में बादाम-अखरोट-खिरनी अर केसर खरीदया। टाबरां वास्तै गरम कोट-जैकेट, दुसाला मोलाया अर भारी मन सूं पाछा बावड़्या।

बावड़ती जातरा मांय पहाड़, खाई, झरणा, नदी, रूंख हरियाळी अर बादळिया रूप पलट पलट'र साम्हीं आवै हा। बादळिया नूंवा-नुंवा, न्यारा-न्यारा रंग बदळै हा। आखी यात्रा में म्हनै लागतो रैया जाणै समूची घाटी बादळियां रो अेक रंगमंच है, जटै बै न्यारा-न्यारा रूप-रंग बदळ-बदळ'र नाटक करै। सगळी जातरा में म्हें तो बादळां रा नाज-नखरा देख-देख'र खुसी सूं गैली हुवती रैया, पण अबै घाटी उतरती बगत होळै-होळै बादळियां रो साथो छूटतो जाय रियो हो। मन अणमनो हो।

म्हें मन ई मन बादळियां सूं कैयो, “रे राम रा बंदां! कदैई आ जाया करो म्हारै ई देस। अठै थे अणूता ई बरस बरस'र गैला हुय रैया हो अर बठै म्हारी पूरी जूण ई थारी उडीक मांय खपती जावै है। भूल्या भटका ई निगै कर लिया करो म्हारी। म्हे सगळा पलक पांवडा बिछाय'र बाट जोवां थारी। जरूर आया भलो!” कैय'र म्हें गाडी री सीट माथै सिर राख लियो अर आंख्यां मीच ली। दो टोपा आंसू म्हारी आंख्यां सूं दुळकग्या।





मनोहर सिंह राठौड़

नानीसा

हरेक टाबर रो, वीं री नानी घणो लाड राख्या करै। “नानी रै अठै जावण दै, दही-बाटियो खावण दै”, आ झींटिया री कहाणी सुणतां-सुणतां आपां री केई पीढियां निसरगी। वै सगळा लोग कदे रा ई सुरग सिधायग्या, पण झींटिया री कहाणी बियां ई चालती आवै। टाबरां रा मन बिलमावै। नानाणा वास्तै कोड जगावै। मूळ सू ब्याज प्यारो लाग्या करै। नानी नै आपरो दोहितो-दोहिती लागै वैडो ओर कोई रिस्तो नीं लागै। नानी कहाणी सुणबा वास्तै भी याद आया करै। पण म्हारै साथै बात दूजै ढाळै ई बरतीजी।

म्हें सदा म्हारा नानीसा नै कहाण्यां सुणाई। म्हें जद नानाणे गयोडो होंवतो, म्हनै सांझ री बगत अठी-उठी फिरतो देखतां पाण नानीसा कैवता, “लेरै भाई, कहाणी सुणा। अै टाबर हरान करबा लागस्या है।” पछै कहाण्यां सरू होवती। नानीसा घणै नेठाव रा धणी हा। बैठ्या-बैठ्या सुण्यां जावता। जकी कहाणी वानै आछी लागती वीं वास्तै फरमाइस कर काढता, “अरै बा कहाणी सुणा!” दूजी-तीजी वार सुण्यां भी वै इयां दरसावता जाणै आज पैली बार सुण रैया होवै। इण सू सुणावण वाळा रो जोस बध्योडो रैवै। कहाण्यां रै बिचै-बिचै वै हूंकारा भी देंवता। “अरे-है नीं, अरे थारी, आ बात हुई के?” इयां कैयनै ठेगा लगावता। वानै म्हें किती कहाण्यां सुणाय दी अर कित्ता जणां सू वै कहाण्यां सुण चुक्या हा, इणरो लेखो नीं लिरीज सकै।

ठिकाणो :
421-ए, हनुवंत-ए
बी.जे.अेस. कॉलोनी
जोधपुर (राज.)
मो. 9829202755

वारै कनै बैठ्यां पछै बातां रा तार आपै ई सळसळावण लाग ज्याता। वै कोई मेळै-खेलै, गांव-गोट, ब्याव-सगाई, आव-जात, हांसी-मसखरी री बात पोळाय देंवता। जैडो आदमी देखता, वीं रै

हिसाब री बात छेड़ देता। पछै सगळा आप-आप रै हिसाब सूं बोल्यां जावता। सगळा हांस्या जावता। नानीसा सगळां सूं बेसी बात रो सुवाद लेता। खिलखिलाय हांसता। हांसी रै साथै वारी आंख्यां सूं पाणी चाल ज्यातो। जकै नैं ओढणी रा पल्ला सूं पूंछ्यां जावता अर हांस्यां जावता। पण बात फोरी नीं पड़बा देंवता।

मोमाख्यां सैत री कूकड़ी रै आरै-सारै दोळ्युं फिस्योड़ी रैवै जियां लुगायां-टाबरां रा झूमका नानीसा रै आसंग-पासंग बैठ्या रैवता। हांसी ठट्टा चालता। बिचै-बिचै पाणी अर मोसम री जकी जिनस घर मै होंवती वीं री मान-मनवार, बैठ्या जका सगळां री हुया करती। बैठ्या रैवता जका वां रै निरमळ सभाव री चरचा आखै दिन करता।

वां रै घर साम्हीं कै वां रै देखतां-देखतां कोई टाबर, जे आखड़ नै पड़ग्यो होवै, सगळां सूं पैली नानीसा नेड़ै पूगता। देखता पाण जोर सूं बोलता, “अरे, औ कीड़ी नै मार दी। ओ-हो ओ के कस्यो भाया!”

अत्ती सुण्यां टाबर आपरी पीड़ भूलनै धरती माथै मस्योड़ी कीड़ी सोधबा लागतो। टाबर संकतो, अरे आ तो गड़बड़ होयगी। अत्ती ताळ में नानीसा वटै पूगनै लाग्योड़ा घाव, छुल्योड़ी चामड़ी रै आडो हाथ लगाय लेंवता। पाणी सूं सावळ धोयनै हळदी-घी रो ग्याभणो फूवो त्यार करवाय नै बांध देंवता। पछै वीं टाबर नैं घरां पुगावता। टाबर हाथ में लियोड़ी गोळी कै नानीसा सूं लियोड़ा लाडू रा खेरा में मस्त होयोड़ो कीं आंसू टळकातो, हांसतो-टसकतो आधा दरद नैं भूल जावतो।

म्हारा नानीसा ओछी रास रा, गेंहुवै रंग रा अर पतळै हाथ-पगां वाळा हा। म्हैं जद सूं देख्या, वारै मूंडै रै मामूली-सा सळ हा। जाबक-सा झुक नै चालता। पतळो मिनख दीखबा में पतळो जरूर दीखै, पण चाल में तरक-मरक करनै उतावळो ई होवै। बियां ई वै, चालण रो काम पड़्यां, साथै चालती जोध जवान बहुवां सूं लारै कदैई कोनी रैया। वां दिनां राजपूतां री लुगायां घरां सूं बारै कम ई निसरती। सावण रा बन सोमवार, अठी नै री लुहागर जी री फेरी, नवलगढ रो बाबा रामदेव रो मेळो, कै खेतां में, कै कोई रै अटै ब्यांव-सावै आपसरी में ढाण्यां-ढपाण्यां में ई जावणो होवतो। आई साल खेती री बगत लुगायां रो झूमको आप-आपरा खेतां री दो-चार बार फेरी जरूर देयनै आवतो। बस, अै ईज मौका हा जकां में अै लुगायां उपाळी बगती। बाकी आखी साल, घर भलो कै दो-चार घरां सामलै चौक री हथाई।

म्हारा नानीसा कहाण्यां, किस्सा सुणबा रा सोखीन हा। बहुवां काम संभाळ राख्या हा। वै काम करबो करती। नानीसा री मैफिल जमी रैवती। कोई री बैन-बेटी पीहर आयोड़ी होवो, वा दोपारी में घणी बार म्हारा नानीसा कनै ई बैठी लाधती। नूंवी आयोड़ी बहू, रावळै में सगळा घरां री बूढी-बडेस्यां रा पग दाबवणा, पगैलागणा री रीत-रिवाज वास्तै निसस्यां करती। वीं नैं सगळां सूं बेसी बगत नानीसा रा चोक में ईज लाग्या करतो।

केई टाबर, बायां नूवी बहू रै साथै ई बग्यां जावता। केई लुगायां, टाबर पैली सू नानीसा रा चौक में बैठ्या उडीकता। सगळ्यां नैं सावळ ठाह है कै अठै ई जमघट लागसी। बातां सुणबा, खिलका देखबा री गरज सू वा जबरी उडीक होया करती।

आ उडीक निरफळ कोनी जाया करती। वठै पूयां, नानीसा रै पगैलागणा होवता। वै बहू नैं गळै लगाय लेंवता। वीं बगत वारै मूंडै माथै आयोड़ी पळक, आंख्यां में अपणेस, चेहरै री रंगत ई सांतरी होवती। हदभांत खुसी वारा डील सू उफण-उफण बारै नीसरती। अँड़ा राजी होवता जाणै वारा अेकाअेक बेटा री बहू आगणै में पैलीवार पगल्या मांड्या होवै। जद कै वारी दोन्यू बहुवां आयां बरस बीतग्या। पोता-पोती मोटा-मोटा फिरै लाग्या।

पछै नानीसा नुंई आयोड़ी बहू री मूंडो दिखाई री रीत री पालना करता। नेग लेंवता। आसीस देंवता। वै दूजी लुगायां री जियां मामूली घूंघटो ऊंचो करनै देखबाळा नीं हा। वै तो सावळ उघाड़नै निरखता। इण मौकै जे घणी लाजवाळी बहू, बेगी-सी मूंडो पाछो ढक लेंवती जद वै ओरूं घूंघटो उघाड़ता, “भाई, हाल म्हनै सावळ कोनी दीस्यो। बूढी लुगाई री निजर है।” इयां कैयनै खासा ताळ घूंघटो ऊंचो कर्यां राखता। औ ईज मौको होवतो जद भेळी होयोड़ी सगळी लुगायां आयोड़ी बहू नैं सावळ निरख-परख लेंवती। आ सावळ देखबा री मन में सगळ्यां रै ई होवती। आ मनस्या अठै पूरी होया करती।

जद कोई लुगाई बहू रा नाक-नक्स री टीका-टीपणी सरू करती, नानीसा बरज देंवत, “देखो अे लुगायां! अै कपड़ै री कातरां करणै रो काम आप-आप रै घरां जायनै करो। अठै बस बहू देखो अर गीत गावो।” पछै दो-चार गीतां रा सूंण होवता। वारो कैवणो हो, “आयोड़ी बहू नैं सावळ देख लेवै तो आं लुगायां सू लारो छूटै। नीं जणां आवता-जावतां, कठैई मारग में मिल्यां, अै मूंडा उघाड़-उघाड़ देखसी। बापड़ी छोरी नैं हरान करसी। औ रबरबाटो मेट दियो।” साच्याणी बहू रो लारो छूट ज्यातो। फेर भी अेक-दोय जणीं तो मारग में धक्यां, “ल्यो भाई, नूवी बीनणी रो मूंडो देखल्यां, जकै दिन भीड़ में सावळ कोनी देखीज्यो।” इयां कैयनै ओरूं देखती।

अैड़ी लुगायां नैं नानीसा ओझाड़ता, “क्यूं हरान करो हो लायण डावड़ी नैं। आपां रै अठै ई रैसी।” इयां सुण्यां उण नूवी बीनणी नैं लागतो कै साच्याणी अै दादीसा कत्ता सांतरा है। जकै दिन अत्ती ताळ घूंघटो ऊंचो राखणै रो मकसद ई ऊंचो हो। नूवी बहू नैं पछै बात समझ पड़ती।

अेकर अेक जणो कोई नै पूछतो-पूछतो मांयनै आंगणै तक आयग्यो। दरवाजै सू ई आवाज दीनी। नानीसा साम्हिं आयनै बोल्या, “अरे ठेट मांयनै कियां आयग्यो बेसरमा! बारै सू ई पूछणो हो। बाको फाड़्यां मांयनै ई आय बड़्यो!”

वो जावतो-जावतो बोल्यो, “दादीजी, बारै कोई दीख्यो कोनी। म्हैं तो थारो टाबर ई हूं। म्हनै ठाह कोनी हो कै मांय कोनी आया करै।”

वीं बगत नानीसा उतावळा-सा बोल्यो, “सैटअप! बारै सूं ई पूछणो हो। वा अबे जा आघो।”

इण बात नैं हथाई री बगत, सिंझ्या नै हांसता-हांसता सगळं नैं बताई। म्हनै मौको मिलग्यो। म्हैं बोल्यो, “अरे नानीसा! आपनैं तो अंगरेजी आवै। अब सूं म्हैं तो हाथ मिलास्यूं।” जद पछै नानाणै आवतां अर पाछा वठै सूं जावतां नानीसा रै म्हैं धोक देयनै हाथ मिलाया करतो। ओ सदा वास्तै अेक मसखरी रो टोटको बणग्यो। अणपढ लुगाई रो सहज रूप सूं हाथ मिलावणो, पढी-लिख्यां नै आंतरे बिठावतो। वां में कित्ती जबरी ऊरमा अर समझ ही। म्हारो मन राखबा, कै टाबर राजी रैवै, वै इयां हाथ मिलावै लाग्या। वै नूंवी बातां नै अंगेजण में ई पैलै नंबर हा। वां सूं आखरी बगत हाथ मिलायनै आयो जद वै माथे हाथ फेर्यो हो। वो वारो सनेव रो हाथ, वानै याद करता पाण म्हनै म्हारै माथै रै फेरीजतो आज भी लखावै।

वै म्हारा मा'सा सूं ई बेसी म्हारो लाड राखता। मा'सा आज वारो वीं बगत री उमर में आयोड़ा बिराजै। वै आपरी अबखायां सूं काया होयोड़ा दो-चार बातां मुसकल सूं पूछै। म्हानै ई अत्ती कमती बातां पूछै जद आया-गया दूजा लुगाई-टाबरां नैं तो घणां पूछबा रो कै बतळावण रो सोचणो ई बिरथा जाणो। जद लागै कै नानीसा कत्ता जीवट रा धणी हा। आपरी हारी-बेमारी, मन री उदासी नैं लोगां बिचै बैठनै भूल ज्यावता। आयोड़ा री दोगाचींती मेटबा, कोई हांसी-मसखरी री बात कैयनै धीजो बंधवाता। वारै कनै आयोड़ो मिनख आपरी पीड़ भूलनै ई बावडतो। कोई घरां में कदे मनमुटाव ई होय ज्यावतो। सासु-बहुवां रा न्यारा-भेळा होवण रा मामला ई बणता। कैया करै नीं कै दोग बासण होवै जका, कदै तो खडकै ई। आ खडबड मेटण री ठौड़ ई नानीसा रो चौक हो। घरां सूं रिसायनै आयोड़ी कै सासु री दबड़कायोड़ी-काढ्योड़ी बहू रो आसरो औ घर ईज हो। और लोग डरता, कै अैडै मौकै मदद कर्यां, आपां सूं गोधम होय ज्यावैलो। पण इण बाबत नानीसा कदैई नीं डर्या। वारो टणकाई चालगी। जकै नैं कीं समझावणी रै मिस कैय दियो, वो पलट नै पाछो कीं नीं कैयो।

अैडै मौकै वै वीं बीनणी री सासू नैं साम्हीं धक्यां ओझाडु देंवता, “अे तूं घणी बडी आदमण बणगी के? काल म्हारै साम्हीं आई ही। ई बापडी पराया घर सूं आयोड़ी छोरी नैं क्यूं हरान करै? काल आ भी सासू बणसी। जा लेयज्या बहू नैं हाथ पकडनै। अैडा खडबडट रा काम चोखा नीं हुवै। बारै मिनखां में घर री इज्जत थोड़ी ई उछळीजै। भली आदमण, थारै सुसरा रो सगळै नांव हो। थे अैडी आयगी जको घर री इज्जत गुवाड में खिंडावै लागी।”

अत्तो सुण्यां पछै वा सासू, आपरी बहू नैं साथे लेयनै चुपचाप चली जावती। बहू रै ई रीस रो आफरो कम होयां, बात सावळ समझ में आय ज्याती। पाछो घर बियां ई चालबा लागतो। सगळां नैं सावळ ठाह हो कै आं रै पेटै पाप कोयनी। जकी बात रो ठाह पड़तो, वै वीं रो खुलासो कर काढता। मन-मन में घोळ मथोळ राखबा री ठौड़ सीधी-सट्ट बात नैं मूंडै ऊपर फटकार दिया करता। कोई भलो मानो, भलाई बुरो। बुरो कोई रो चावता कोनी। इण वास्तै वां सू बैर-बिरोध कोई रो ई कोनी हो। वारी बात रो बुरो कोई कदैई कोनी मान्यो। चुगलखोर, घर फुड़वणवाळी लुगायां वांसू सदा अळघी ई रैयी। वै जकी बात रो ठाह पड़यो, वीं नै अगला धणी सू जरूर पूछता। इण वास्तै सगळा जणां वारै आगै झूठ-साच करबा में डर्या करता।

वै सगळां रा हा। सगळा वारा हा। वारै हाथ में कोई लांवणो, परसाद आवतां ई बांट-चूंटनै वीं बगत ई पूरो हिसाब करता। उधार, घरै पधार री आदत ही। वीं बगत वारै कनै घर रो होवो, भलाई बारै रो। वानै तो आयोड़ी जिनस बांटण सू मतलब हो। पछै कोई घर रो टाबर कैवतो कै म्हनै लाडू कोनी दियो। वै सीधी बात समझावता, “बेटा उण बगत थूं कनै कोनी हो। नीं जणां म्हारा लाडला बेटा नैं पैली देंवती। अब काल कोई लावणो आसी, वो थनै देऊं। थूं म्हारै कनै ई बैठ्यो रैयी।”

वां दिनां कपड़ा सीवण री मसीनां छोटा गांवां में कोनी पूगी ही। सिंवाई रा काम सहैरां में होया करता। जकै रै दोय पईसा हाथ में हा, वै तो सिंवाय लेंवता। गरीब गुरबा अठी-उठी सू तजबीज बैठाता। नानीसा हाथ रा चतर हा। हाथ सू टांको, मसीन री जियां बरोबर आवतो। कीं दया भाव ई घणो हो। आळस वारै पाड़ोस्यां रै ई नीं हो। इण वास्तै अक-दो कुड़ता सीवणा, वां रै छबड़्यां में पड़्या ई रैवता। छबड़ियो ई सुई-डोरा, कपड़ो-कतरणी, कपड़ै री कातरां रो खजानो हो। सावळ सीयां पछै बटण लगावता। कपड़ै री गोळी बणाय, ऊपर कपड़ो लपेटनै बटण बणाय देंवता। इण काम सारू गांव रा गरीब-गुरबा छोरा-मोट्यार आयनै दादीजी री गरजां करता, “दादीजी, उघाड़ो फिरूं। कुड़त्यो फाटग्यो। सीव नै देवो नीं।”

आपरी इण गरज सू वै आया गया मिनख, नानीसा रै खेत में छोटे-मोटो काम कर देंवता। भैंस-गाय सारू भरोटी लियाता। ओढायाड़ो बजार रो दूजो काम भी कर देंवता। “ल्यो दादीजी, पग दाबद्यूं...” इयां कैयनै केई लुगायां आपरी सिंवाई करवायनै लेय ज्यावती। औ सिलसिलो बारूमास चालतो। कदै कोई सारै बैठी लुगाई टोकती, “थे कांई रोजीनां ई जुळ-जुळ करनै सिंवाई करता रैवो हो। कदे तो आराम लिया करो। इयां बेगी ई आंख्यां देय बैठस्यो।”

आं बातां नैं सुण्यां, झूंझळ में आयनै वै आपरो हाथ रोक लेंवता। छबड़ियो अक पसवाड़ै सिरका देंवता। थोड़ी जेज में वो छोरो बिना कमीज रै उघाड़ो वारी आंख्यां आगे

घूमबा लाग ज्यातो। बातां रै बिचै वारै हाथ में हळवां-सी कद वो अधखलो सिंवीजतो कुडतो आय ज्यातो, वानै खुद नै ई ठाह नीं पडतो। कोई सरदी मरतो चेहरो वानै चेतै आवतो। कोई गांव-गोट सारू महीनां पैली ई कपडो दियोडो राखतो। वै सगळं री भावनावां समझता। कियां-जियां सगळं रा हिसाब बिठावता। पछै मसीनां आयगी। कोई मोल लियायो। कोई रै ब्यांव में आयगी। मसीनां गिणती री ई ही। जकै में गरीबां री कुण सुणै? आं सगळं रो आसरो नानीसा ईज हा। वै जीया जतै, इण काम नै करता रैया। पछै हांण हटग्या। हाड-गोडा सफा जबाब देयग्या। वीं बगत ई अेक-दोय जणां तो वारै कनै कपडो छोड्योडो राखता, “दादीजी होळै-होळै सिंवाई करनै देय दीज्यो। म्हारै उंतावळ कोनी।” वै सुरग सिधाया जकै दिन भी वारां छाबडिया में अेक कमीज सींवणो पड्यो ई हो। वारै सुरग सिधायां पछै वो छाबडियो खाली होयनै बाडै में बगाईजग्यो। केई दिनां पछै वो छाबडियो देख्यां म्हनै आज रा स्वारथी संसार री ठौड वारी लगन, मैणत, अपणेस, मदद अर दया भाव चेतै आयग्यो।

होळी-दिवाळी, वार-तिंवार, जलम आठम, गोगा नोमी, सरद पून्यूं जैडा घणाई तिंवारां रै मोकै आयोडा टाबर कै मिनख नै मूंडो अँठ्यो जरूर करवाता। वारै कनै पूंजी कीं ई कोनी ही। दाळ-रोटी मजै री ही। भेळो करणो जाणता कोनी। बगत माथै परईसो कोई रै काम आय ज्यावै, जकै नै मोटो मानता। कोई रै भात-छूछक, बेटी रा सगाई-ब्यांव जैडा मौकां में आपरी जिम्मेवारी माथै परईसां रो बंदोबस्त कर देंवता। परईसा मोडा-बेगा पूग ई ज्यावता, पण जकी लुगाई मदद मांगबा आयगी वीं रो काम अटक्यो नीं रैवण दियो। आगलै री बेटी नै टीबडी चढावण में सुख-संतोस सदा ई मान्यो।

नानीसा 90-95 बरसां रा होयग्या जद ताणी वारां दांत छोटा-छोटा इकसार, धोळ धप्प फूटरा हा। केई कैवता कै दादीजी रै अँ दांत दूजा आया है। दांत अँडा हा कै चिणां चाबल्यो भलाई। आज तीसी पूग्योडा, मोट्यारां रा पीळा-पीळा, डोडा-बांका, छीदा दांतां नै देख्यां लागै कै आज वै नानीसा जीवता होंवता तो पेप्सोडेंट कै कोई दूजी कंपनी आपरा प्रचार, विग्यापन सारू वारै दांतां री फोटू, बुरस करता थकां खेंचनै लेय ज्याती। वै सदा राख री चूटी कै बाळू रेत नै दांतां रै रगडी अर स्याफ। खास बात आ ही कै हाजमो चोखो हो। इण सूं जीभ-होठ लाल अर दांत मोत्यां जैडा सफेद सदा ई रैया। मूंडो अर चेहरो पूंछबा नै ओढणियै रो पल्लो हो।

जद कोई नै रोटी परोसता, आपरै ओढणियै रो पल्लो थाळी पूंछबा नै काम लेंवता। स्याफ थाळी नै ई वै पूंछणो नीं भूलता। इणमें वारो अपणेस परगटीजतो। घर रा मिनख कै आयोडा पांवणां री रोठ्यां सावळ सज ज्यावै, वो सावळ जीम लेवै इण सारू बै बरोबर निगह राखता। खुद वास्तै जे साग कोई दिन नीं बच्यो तो मिरच-धणिया, छाछ में बांटनै छाछ-राबडी रै स्हारै सूं जीम लिया। मन में हरखीजता कै, आज म्हांटो साग घणो सुवाद

हो। सगळ्या जणां गैरो-गैरो जीमग्या। अत्ता संतोसी मिनखां री तो आज कहाण्यां ई बणगी।

म्हारा नानोसा नाडी-बैद हा। देसी दवायां दिया करता। वारी बतायोडी दवायां नैं कूट-पीट कपड्छाण करणो नानीसा रैं जिम्मै ई हो। अत्ती बेगार-दूजां वास्तै मुफ्त में करता थकां ई कदैई नाक में सळ नैं घाल्यो। नानोसा नैं पांच-दस मिनट लागती, दवायां बताय जावता। वां दवायां नैं सुकावणी। पछै कूट नै कपड्छाण करणै रो काम नानीसा घणी सावचेती सूं करता। इण काम में दो-चार घंटा लागता। कोई जणो झाडा-मंतर सारू आय ज्यातो। आयोडा नै बिठाणो। पाणी वास्तै पूछणो, अै सगळी जिम्मेवारियां नानीसा री।

वानै खुद नैं खासा घासा-गळ्ठी याद हा। कोई टाबर री मां कै बडोडा आपरी अबखाई सारू आयनै बतांवता। अै जीभ हेतै ई नुस्खा त्यार राखता। वीं बगत ई बताय देवता कै इयां-इयां करनै घासो देय दीजै। वारी साची जबान नैं जस हो। जको ई कीं बताय दियो वो ई पुख्या असर करग्यो समझो।

वै पूरी हिम्मतवाळी रजपूताणी हा। अेकर गांव में लाय लागगी। वीं बगत ताणी आखै गांव में अेक गोगाजी री मैडी पक्की बणयोडी ही अर अेक बडो कमरो नानीसा रैं ई पक्को हो। आं दोनुवां नैं छूट आखै गांव रा काचा टापरा, छान-छपरियां सूं छायोडा हा। लाय सूं बचावण नै जकां रैं कनै कीं घणमोलो सामान, पेट्यां-पेवट्यां ही, वै ल्याय-ल्याल नानीसा रैं अठै छत तांणी कमरै नैं भर दियो। बाकी रा लोग लाय बुझावै हा। आखै गांव रा छान-छपरियां री लपटां ऊंची ऊठगी। केई जणां रा टाट-बकरिया बंध्या-बंध्या बळग्या। मामूली बासत्यो री झळ सूं अेक घर भी अळूतो नैं रैंयो।

इण मौकै हुंस्यार मिनख कूवा जोड दिया। पाणी भर-भर बासत्यो में बगाईज्यो। नानीसा सगळ्यां रो सामान रखवायो। अेक-दो लुगायां उण विणास लीला सूं बेखळखातै होयगी, वानै धीजो बंधवायो। राजी-राजी समझाय पछै फटकारनै चुप कराई। लाय बुझ्यां पछै रात री बगत जकां रो सो-कीं बळग्यो, वारै वास्तै केई घरां में खीचडा, खीचडी, राबडी, साग-रोट्यां बणवायनै जिमाया। केइयां रैं अठै रोट्यां भिजवाई। थ्यावस बंधवाई। आ व्यवस्था वै दो-चार दिनां ताणी करी। आपरी गायां-भेंस्यां रो दूध, केई दिनां ताणी सो क्यूं लुटायोडा गरीब घरां रा टाबरां वास्तै देवता रैंया। पछै पाछा छान-छपरिया बंधवावण में जकां रैं कनै सांवठा पूळा हा, वै दिरावण में नानोसा साथै नानीसा ई मदद करी। केई मुफ्त में पूळा दिया, केई जणा सूं पईसां साटै लिया। औ काम पाछो ढबसर जम्यां पछै गांव री गुवाड में वै लोग बतळाता कै धिन है ई छत्राणी नैं। आ आपरी मां रैं अेक ई जलमी। इण महाविणास में जबरी मदद करी। अैडै मोकै कई मोट्यारां जीभ बगाय दी। पण आ लुगाई होयनै मरदां सूं बेसी बाजी मार ली। आ कथा बरसां बरस चाली। जद पछै नानीसा

आसंग-पासंग रा गांवां में पूजनीक बणग्या। केई जणा तो देवी रो रूप समझनै इणां रै दरसणां सारू ई आया। गांवां में अफवावां फैल ज्यावै। कीं वा बात ई होई।

इणसूं ई सवाई मरदानगी रो मौको अेकर औरूं आयो। सियाळै रा दिन हा। नानोसा गांवतरो करबा गायोड़ा हा। वां दिनां चोर-डाकुआं रो जबरो जोर बध्योड़ो हो। पांच-सात आदमी आयनै उण कड़कड़ाती डांफर मांय दो-चार आदम्यां नैं बंदूक रा जोर सूं डरायनै बांधग्या। पछै घर नै सावळ लूट लियो। सरदी में आखो गांव सूतो रैयग्यो। इण घटना रो हाको फूट्योड़ो हो। आखै दिन इण री चरचा होवती। बीं रात कोई सांसर-ढांढां रै दड़बड़ाट सूं गांव में जाग होयगी। सगळा चौकन्ना हा। केई जणा डरता रजायां ओढली। नानीसा ऊंचा कमरा माथै नानोसा री पिस्तोल लेयनै चढग्या। मामोसा नौकर्यां में हा। ठंडी ठारी चढती रात में आधो गांव सूतो हो। आप-आपरी गवाड़्यां में जागतोड़ा सावचेत हा। नानीसा ढळती रात ताणी अेकला छत माथै बैठ्या रैया। पछै जायनै तड़काऊ रा सोया।

दिनगै लोगां पूछी, “दादीजी, धाड़ेती आज्याता जद के करता?”

नानीसा दड़क्या, “करबा नै के हो, अेक-दोय नैं ढाय देंवती। पिस्तोल में कारतूस छः हा। अत्तो होयां पांच-सात मोट्यारां रा ई पग उपड़ ज्याता।”

इण हादसै पछै नानीसा गांव रा झांसी रा राणी ई बणग्या। केई दिनां ताणी बातां अर वांसूं मिलबा आवणो चालतो रैयो। जातरा सूं नानोसा आयनै कैयो, “अैड़ी गैलाई नीं करणी ही। काल नै साच्याणी कीं घटना होय ज्याती तो...? थे लुगाई री जात हा।”

नानीसा चटकै ई पडूतर दियो, “लुगाई होवो भलाई मरद, मरणो तो अेकर रो है।”

आखी उमर दूजां वास्तै आपरी जिंदगाणी नै काम लेबाळा मिनख अब कहाण्यां-किस्सां में लाधै। म्हैं सांतरी किस्मत रो हूं जको अैड़ा म्हारा नानीसा हा। वारी गोदी में म्हैं खेल्यो। वै नानी होयनै कहाणी कैवण री लकब नीं जाणता। म्हैं वानै कहाण्यां सुणाया करतो। म्हारो मोटो भाग कै आज म्हैं वारी कथा आपरै सामै परगटी हूं। साचा अवतारी सिद्ध पुरख तो देखबा में कोनी आया। म्हारै वास्तै तो वै अवतारी ईज हा। जद-कद याद करूं दूबळी काया रा, मुधरा-सा, लिलाड़ री चामड़ी में सळ पड़्योड़ा वै म्हारै साम्हीं आय ऊभै। वारा बकरी जिस्या छोटा-छोटा धोळा दांत, लाल होठां रै बिचै सूं हांसता हरख रो समदर लहराय देवै। मिनख यादां में जीवतो रैवै जद आंतरै कटै गयो? वै अठैई कटै होवैला, अैड़ो म्हनै लखावै। औ म्हारो पक्को बिस्वास है।





डॉ. फतेहसिंह भाटी

‘नेव निवाळी’ सू पड़तो नारी मन री पीड़ रो परनाळो

किरण राजपुरोहित ‘नितिला’ बहुमुखी प्रतिभा री धनी है। बे जित्ती सहजता सू हिंदी मांय लिखै, बित्ती ई सहजता सू मायड़ भासा राजस्थानी में ई रचै। कहाणियां अर कवितावां टाळ उणां रै बणायोड़ा रेखाचित्राम हंस, पाखी, मधुमती, अहा जिंदगी जैड़ी ख्यातनांव पत्रिकावां मांय छपता ई रैवै। वारी आंगळ्यां सितार रा तारां माथे जित्ती रफ्तार सू रमै बित्ती ई चतराई सू रंगां अर ब्रुस रै सागै भी। उणां कीं बगत पैली ई शॉर्ट मूवी मांय उटीपा अभिनय सू अेक नवी सरुआत ई करी है।

‘नितिला’ जी रै नवै राजस्थानी कहाणी-संग्रै ‘नेव निवाळी’ मांय कथा, सिल्य अर भासा री बणगट अर पठनीयता तो उम्दा है ईज, पण कीं कहाणियां मांय नवा प्रयोग ई करीज्या है। राजस्थानी में जे इण भांत रा नवा प्रयोग व्हिया ई है तो साव थोड़ा।

पीड़ रै बिना सिरजण व्है ईज नीं सकै। परकत जद सिरजण रो काम नारी नैं सूप्यो तो हरेक महीनै रा कीं दिना में पीड़ भोगणी ई उणरै हिस्सै लिखीजी। पण इण पीड़ नैं ई वा पीड़ नीं समझै। पीड़ा इण बात री है कै अेक अबोध छोरी अचाणचक पीड़ सू कुरळवै, उण रा गाभा रगत सू भीज जावै, मन मांय अलेखूं संकावां न्यारी उठै कै ठाह नीं उणसू काई गुनो व्हैयग्यो है! अबै वा आपरै माईतां अर बैन-भायां सू काई कैवैला ? तन अर मन दोनूं सू घावळी उण भोळीढाळी किसोरी री मनगत नैं कहाणी ‘काचा कंवळा’ मांय लेखिका घणै सांतरै ढंग सू उकेरी है तो कहाणी ‘रतन दीवां भ्मैल’ मांय वै कैवै कै भलाई करोड़ां लोगां रै बिचाळै

ठिकाणो :
351, मोहन नगर बी
बी.जे.एस. कॉलोनी,
जोधपुर-342011
मो. 9414127176

कित्ती ई चिंतावां व्हो, पण नारी रै जीवण रो हरेक सुख हरेक दुख अेक ईज मिनख रै खंवै सूं जुड़योडो व्है। वा है तो जीवण रा सगळा रंग है, उणरै नीं व्हियां जीवण ई बिरंगो है, स्याह है, साव सूनो है।

ठीक इणीज भांत लुगाई री पीड़ 'बरंगो तावडो' कहाणी ई बयान करै। इण मांय लेखिका लिखै कै टाबर जिणणो समाज रो मूंडो बंद राखण सारू जरूरी है तो खुद नैं 'बिजी' राखण रो जरियो भी। कोई कित्ती ई आधुनिक क्यूं नीं बणै, पण मातृत्व रो तोडो मांय रो मांय उणनैं कठैई सालतो रैवै, कुंठां सूं भरै, बेचैन करै। कहाणी 'सीली-संद जर्मी' मांय लेखिका लुगाई रै सुख अर दुख दोनूं रो जिकरो करै। आदमी कित्तो ई सिमरथवान व्हो, उण रा मकान ई अेक सूं बेसी व्है सकै पण घर अेक ईज व्हिया करै। औ सौभाग फगत लुगाई नैं ईज है कै उण रा दो घर व्है सकै। हालांकै औ उणरो सौभाग है, पण इण सौभाग अर साधना रै उपरांत ई घणकरी अभागणां रै अेक घर ई पांती नीं आवै।

'तिरसी नेव' अेक कहाणी मांय दो कहाणी समेट्योडी है। इण कहाणी रो विसय अैडो है जिण माथै इण पोथी रै लोकारपण रै टाणै मधु आचार्य 'आशावादी' कैयो कै इण कहाणी माथै उपन्यास लिखीजण री पूरी संभावना है। म्हैं ई वारी इण बात सूं सहमत हूं। प्रेम अर देह री पीड़ दोनूं विसय सईकां सूं मिनखाजात सूं जुड़योडा है। आपां रै आंख्यां बंद करण सूं अबखायां सुळ्झै नीं अपूठी वत्ती उळ्झै। फेरूं ई समाज कै पाठकां री प्रतिक्रिया सूं बचण खातर घणकरा लेखक इण कहाणी मांय लिख्योडी दैहिक पीड़ नैं लिखण सूं कत्री काटै।

सौभाग सूं इण पोथी रै छपण सूं पैली आ कहाणी बांचण रो मौको मिल्यो हो अर म्हैं औ विसय किरण जी रै साम्हें राख्यो हो कै इण कहाणी माथै करडी प्रतिक्रिया व्है सकै! औ ई व्है सकै कै पाठक सिरै सूं ई इण तरै रै विमर्स नैं 'रिजेक्ट' कर देवै। फेरूं ई अेक महिला लेखक सामरथ जुटायो अर इणी कहाणी नैं पोथी मांय ठौड़ देवण री 'रिस्क' ली। आ वारी लेखण-धरम पेटै निस्टा ईज मानो। म्हारै खयाल सूं आ कहाणी 'राजस्थानी कहाणी' रै बदळाव मांय मील रो पत्थर बणसी, उणनैं अेक नवी दिसा देवैला।

आ कहाणी जठै देह-सुख रै चरम नैं उकेरै, वठै ई प्रेम रै चरम नैं ई परिभासित करै। प्रेम, नीं तो हासल करण रो नांव है अर नीं गमावण रो। वा तो फगत आपरै प्रेमी नैं सुख सूं भर देवण री चावना है। उणरो सुख उणनैं छोड देवण मांय है तो थे वीतरागी बणनैं उणनै मुगत करता थकां सिरक जावो। जे उणरो सुख थांसूं अेकमेक व्है जावण मांय है तो थे थारो सगळो बुद्धत्व, आपरी आखी रिधियां-सिधियां, आपरी आवगी अद्भुत सगत्यां छोड रै ई बावड आवो, औ ईज प्रेम है।

आपरी कहाणियां मांय लेखिका फगत लुगाई रै मन री पीड़ ईज नीं उकेरी। राजस्थान मांय कच्चा घर कीकर बणता हा, वारी खासियतां सूं लेयनै मकान सूं घर बणण री प्रक्रिया आपनै 'चांदा ऊपर कणी' कहाणी मांय देखण नै मिलसी। 'उधड़यो चंदोवा' मांय छात, आभै अर ओळ्ळंवां री पगडांड्यां मांय भटकता दो जाती मिलैला तो सोशल मीडिया अर जनरेशन गेप सूं ई वानै सरोकार है। सोशल मीडिया री लत किणी नसै सूं ई घणी भूंडी है। खास करनै किणी लुगाई अर आदमी रै बिचाळै मैसंजर माथै होवण वाळी चैट। बगत रै साथै अेकांयत रा खिणां मांय कीं अैड़ी उणमादी बातां होवण लागै कै चावतां थकां ई उणसूं छूटणो दोरो व्हे जावै। अैड़ी लत सूं सैकड़ां घर बरबाद व्हिया है। 'थळगत मत डाक आगळ' मांय किरण राजपुरोहित कैवै कै समझदारी इणमें ईज है कै आगळ मतळब कै लिछमण-रेख नीं लांघणी चाईजै। आजकाल हरेक अखबार, पत्रिका, स्पीकर पेरेंटिंग रा गुर सिखावै। औ ई सिखावै कै टाबरां सूं किण तैरै वैवार करणो चाईजै। पण आ कोई नीं बतावै कै टाबरां नैं किण तैरै वैवार करणो चाईजै। जनरेशन गेप री आ पीड़ 'सरकती व्हेल' मांय प्रगट व्हे। इणी भांत मूंधा व्हेता इलाज, सरकार सूं ठगीजता करसा अर गरीब री व्यथा कहाणी 'खिरता लेव' मांय है।

'नेव निवाळी' मतळब कै कच्चा घर री छात रो वौ हिस्सो जठै सूं बिरखा रो पाणी पडै। नाम रै परवाण हरेक कहाणी घर-परिवार सूं मेळ करावै अर उण मांय रसियो-बसियो प्रेम, करुणा, पीड़ आंख्यां नैं ठीक वियां ई बरसावै।



पोथी : नेव निवाळी

विधा : कहाणी-संग्रै

कहाणीकार : किरण राजपुरोहित 'नितिला'

संस्करण : 2020

प्रकाशक : सूर्य प्रकाशन मंदिर, बीकानेर

पाना : 120

मोल : 250 रुपिया



भाषा, साहित्य एवं लोक संस्कृति में
निरन्तर 60 वर्ष की सेवा पर
मरुदेश संस्थान, सुजानगढ़ द्वारा संस्था को
कन्हैयालाल सेठिया राजस्थानी भाषा सेवा सम्मान
अर्पित किया गया।

महावीर माली, राष्ट्रभाषा हिन्दी प्रचार समिति, श्रीडूंगरगढ़ (राज.)

खातर महर्षि प्रिण्टर्स, श्रीडूंगरगढ़ में छपी

राजस्थली लेन-देन साधु :

खाता नांव : RAJASTHALI
बैंक : बैंक ऑफ इंडिया, श्रीडूंगरगढ़
खाता सं. : 746210110001995
IFSC : BKID 0007462

Website : <http://rbhpsdungargarh.com>